

uero grossa inæqualitate per temporum spacia  
nunc maiora, nunc minora, ut in omnibus suffi-  
ciat, comprehenditur. Tempus autem est effectus  
corporum supercœlestium motus, ex quo quanti-  
tatis dimensionem & numerum, & qualitatis al-  
terationem sortitur.

Computista autem partes temporis, quandoq;  
die maiores, quandoque minores determinat. Par-  
tes temporis die maiores sunt, Septimana, Mensis,  
Annus, Lustrum, Indictio, Sæculum & Aeuum, de  
quorum singulis per ordinem in consequentibus di-  
cetur. Partes temporis die minores sunt, Quadrās,  
Hora, Punctus, Momentum, Vncia, & Atomos.

## DE PARTIBVS TEM- poris minoribus Die.

**Q**uadrans, est quarta pars Diei natu-  
ralis, id est, sex horarum integra com-  
prehensio. Hora est uigesimaquar-  
ta pars diei naturalis. Horarum uero alia Natu-  
ralis, alia Aequinoctialis. Naturalis est spacium  
temporis, quo medietas signi peroritur. Aequi-  
noctialis uero est 15. graduum circuli æquino-  
ctialis supra horizontem ascensio, uerunta-

men utraque illarum naturalis, nisi discretionis  
causa poterit appellari. Punctus quidem in solari  
computatioe, est quarta pars horæ unius, in luna-  
ri uero, quinta. Momentum est decima pars pun-  
cti, prout prius sumebatur punctus. Vncia uero  
est duodecima pars momenti. Atomos est 48.  
pars uncie. Astronomica tamen per 60. usque  
ad minimum cuiuslibet integri, uniformis est fra-  
ctio. Cum igitur in istarum temporis partium &  
differentiarum computatione huius scientiæ con-  
sistat completio, à computando nomen Compu-  
tus accepit. Non quod computare doceat, sed  
quoniam numeris certis & subtiliter coniunctis  
doceatur.

#### DE DIEBUS NATURALI- bus & Artificialibus.

Ierum autem alius Naturalis, alius Ar-  
D tificialis. Naturalis est 24. horarum, à  
quocunque quatuor punctorum meri-  
diani uel horizontis sole inceptarum, continua  
comprehensio, id est, diei & noctis completæ spa-  
cium, Vnde illud Genesis, Factum est uespere &  
mane dies unus: Item,  
Qui mane iunctum uesperis,  
Diem uocari præcipis.

Dies uero artificialis, est spaciū temporis ab ortu solis usque ad eius occasum, unde artificialis dies, est Sol lucens super terram. Nox autem est umbra terræ, in Solis oppositum diametraliter extensa, Et dicitur Nox à noceo noces, est enim tempus nocentibus aptum.

Notandum igitur, quòd Dies naturalis secundum diuersos, diuersa habet principia. Romani enim diem naturalem à media nocte incipiunt, & ibidem terminant. Quoniam legitur, quod Dominus natus fuerit in medio noctis diei Dominiæ. Et quoniam Sol quæ causa est diei, à puncto remotissimo in media nocte incipit ascendere.

Arabes uero à meridie incipiunt, qui dicunt Solem fuisse factum in meridie, secundum cuius motum diem considerant. Iudæi autem à uespere, innitentes illi auctoritati Genesis, Factum est uespere & mane dies unus. Quidam etiam secundum sensum agentes, ut uulgus, diem naturalem ab ortu Solis incipiunt, quia cum Sol sit causa diei, tunc merito debet dies incipere, cum Sol effertur supra nostrum horizontem. Est autem horizon circulus, quem sibi circumscribit cuiusque aspectus. Meridianus uerò est circulus, quem Sol à polo ad polum per hominum uerticem transeuntem die media designat.

Huius itaq; diei secundum medicos quatuor distin-  
guuntur quadræ, Quarū prima est, ab hora noctis  
nona usq; ad 3. diei, calida, & humida, in qua san-  
guis mouetur. Secunda uero à tertia diei artificia-  
lis, usq; ad nonam eiusdem, calida est & sicca, in  
qua cholera euentatur. Tertia à nona diei artifi-  
cialis usq; ad tertiā noctis, frigida & sicca, in qua  
melancholia multiplicatur. Quarta est à tertia ho-  
ra noctis, usq; in nonā eiusdē, frigida & humida,  
in qua phlegma fluctuat, Vnde uersus.

Tres lucis primas, noctis tres sanguinis imas,  
Vis Cholerae medias lucis sex uendicat horas,  
Datq; Melan primas noctis, tres lucis & imas,  
Centrales ponas sex noctis phlegmatis horas.

Dies Artificialis similiter in quatuor quadras ab  
autoribus diuiditur. Quarū prima rubēs, secunda  
splendens, tertia urens, quarta tepēs dicitur. Vnde  
Sol 4. equos habere fingitur, Quorū nomina sūt  
hæc, Eous, Lāpas, Pyrois, Phlegon, Vnde uersus.

Solis equi lucis dicuntur quattuor horæ,  
Hæc rubet, hæc splendet, hæc calet, illa tepet.

Notandum etiam quod dies Septimane secundū  
diuersos, diuersas habet appellationes. Philosophi  
enim gentiles quemlibet diē septimane ab illo Pla-  
neta qui dominatur in prima hora illius diei deno-  
minant. Dicunt enim planetas successiue dominari  
per horas diei, quorum nomina & sphaerarum or-  
dinatio in subscripta figura clarescunt.

# FIGVRA OSTENDENS

distributionem & ordinem Sphærarum,  
æthereæ regionis.



Vnde uersus.

Post s i m s v m sequitur, ultima Luna subit.

Vel ordine retrogrado sic.

Cynthia, Mercurius, Venus & Sol, Mars, Ioue.  
Satur.

Ordine retrogrado sibi quilibet uendicat horam.  
Supponatur igitur, quod Saturnus dominetur in  
prima hora diei Sabbati, Iupiter in secunda, Mars  
in tertia, Sol in quarta, Venus in quinta, Mercu-  
rius in sexta, Luna in septima, Item in. 14. simili-  
ter in 21. Saturnus in. 22. Iupiter in. 23. Mars in.  
24. Vnde cum non sint plures horæ in illo die na-  
turali, relinquitur ergo quod Sol dominetur in pri-  
ma hora diei subsequenti, à quo dicebatur dies  
Solis, & inde recipit appellationem. Et consimi-  
li computatione habebimus, quod Luna domina-  
tur in prima hora diei subsequenti diem Solis,  
& inde recipit denominationem, & sic de alijs.  
Secundum hoc igitur sagaces medici, cum dant  
potiones, uel faciunt minutiones, considerant  
utrum planeta beneuolus uel maleuolus domine-  
tur in hora illa. Beneuoli sunt Iupiter & Venus,  
Maleuoli Saturnus & Mars. Indifferentes uero  
Sol, Luna, & Mercurius, Vnde uersus.

Iupiter atque Venus bene sunt, Sat. Marsq; ma-  
ligni.

Sol & Mercurius cum Luna sunt mediocres.  
Qualitates quidem eorum complexionales in his  
patent uersibus.

Frigidus & siccus Satur. Iup. aestuat udus.

Mars & Sol sicci feruent, sed Luna, Venusq;

Vdæ frigescunt, medius Cyllenius esto.

Humana quidem persuasio stellis numeros & no-  
mina fecit, non ex sui natura, sed significatione di-  
sinctionis accommodata.

Vnde Bernardus Syluestris dicit.

Communi ne uoce rei generalis aberret,

Quæ modo sunt stellis nomina fecit homo.

Item Vergil. in. 1. Georg.

Nauita tum stellis numeros & nomina fecit,

Pleiadas, Hyadas, clarâque Lycaonis Acton.

Ex prædictis autem soluitur quod competens  
ordo est inter planetas, quod ad circulos suos, &  
dies septimanæ ab illis denominantur. Ergo se-  
cundum eundem ordinem se sequi deberent, ut sta-  
tim diem sabbati sequeretur dies Iouis, & hunc  
dies Martis, & sic deinceps. Ratio autem huius  
est, quod. 24. horæ distributæ sunt planetis, sed  
septem sunt planetæ. Vnde si quilibet illorum suc-  
cessiue sibi assumat tres horas, supererunt de. 24.  
horæ tres, attribuendæ tribus planetis. Sic igitur  
patet, quod si aliquis dies denominetur ab uno



planeta, dies sequens denominabitur à planeta ter-  
tio post.

Christiani autem sicut Beda, Hieronymus, &  
alii uiri religiosi istas appellationes, quoniam à  
gentibus erant impositæ, uolentes transmutare  
diem primum Septimanæ, diem Dominicum, siue  
primam Feriam appellauerunt: Dominicum, quia  
tali die natus est dominus, tali die resurrexit, tali  
die mundum fecit: Feriam, quia feriari idem est  
quod celebrare, & ab opere cessare. Et die illo,  
quem Dominicum appellamus, debemus cessare  
ab omni opere manuali, & etiam peccati: Vel Fe-  
ria à ferendis uictimis dicitur, quoniam olim die-  
bus festiuis ad templa ferebantur uictimæ, & bolo  
causta. Secundum diem Septimanæ, secundam Fe-  
riam appellabant, & sic deinceps per ordinem.  
Nomen uerò Sabbati non mutauerunt, ut appella-  
rent eam Feriam septimam. Sabbatum enim idem  
sonat quod requies, & tali die requieuit Dominus  
ab omni opere, quod patrauerat. Tali etiam die re-  
quieuit in sepulchro, Vnde adhuc tale nomen ob-  
tinuit.

Iudei autem alias habent dierum septimanæ  
appellationes. Primum enim diem septimanæ suæ  
uocant Sabbatum, sicut & nos, diem Domini-  
cum, primam sabbati appellant, unde illud, Mane



prima sabbati surgens. Dei filius, id est, prima die post sabbatum. Diem uero, quem nos dicimus diem Lunæ, secundam sabbati appellant, & ita deinceps.

Dicitur autem dies à d'ios, quod est clarum, uel à d'uo, quod est duo, quoniam dies naturalis in duo diuiditur, In diem scilicet artificialem & noctem. uel dicitur dies à Dijs. planetæ enim dij dicebātur, à quibus dies denominantur.

## DE PARTIBVS TEMPORIS

DIEI MAIORIBVS, ET PRIMO de Septimana.

St autem Septimana septem dierum naturalium, die Dominico inchoata, successiua progressio. Et notandum quod septimanæ non habent proprias appellationes, quemadmodum dies, duplici ratione, cum propter earum multitudinem, sunt enim in anno 52. septimanæ, & unus dies; tum propter hoc, quod spaciū dierum in uno anno existens una septimana, est partes duarum septimanarum in anno sequenti. Et ita si esset aliquod nomen appropriatum ei, esset permutandum in alio anno, quod est inconueniens. quod sic patet. Si in hoc

anno sit aliquod festum in die Sabbati, idem erit in anno sequenti in die Dominico, unde illud festum quod terminat septimanam in hoc anno, erit initium alterius septimane in anno sequenti.

Habent tamen septimane communes appellationes has, scilicet, hebdomada, septimana, sabbatum. Hebdomada ab ἑβδομα dicitur, quod est, septem, & duas, quod est, dies, quasi septem habens dies. Septimana dicitur à septem & mane, quasi septem habens mane, id est septem matutina tempora, & sic sumitur pars pro toto. Sabbatum etiam dicitur septimana, per quod significatur, quod per totam septimanam quiescere debemus ab opere peccati. Vnde illud, Ieiuno bis in sabbato, &c. Ex his patet, quod sabbatum est æquivocum ad totam septimanam, & ad unum diem ipsius. Si autem queratur, quare sabbatum in solennitate & hebdomadæ inchoatione sicut Iudæi non auctorizemus? Sciendum quod solennitas sabbati auctoritate domini in diem Dominicum transiit. Nam tali die natus est dominus, tali die resurrexit, tali die dona sancti spiritus apostolis misit. Item Iudæis omnia sub typo contigerunt & figura. Figura autem & figuratum non idem sunt. Sicut de agno uero, & de agno paschali, Arca fœderis & Ecclesia patet. Sabbatum ergo & dies Dominicus idem esse non debent.

## DE MENSIBVS.

**M**ensium autem, alius Solaris, alius Lunar  
ris, alius Vsualis.

Solaris est spaciū temporis quādiu  
moratur sol in signo peragendo. Vnde Philoso  
phus, Sol unum duodecim signorum integro men  
se metitur.

Lunaris est propriè post Lunæ à Sole recessum  
eius ad Solem reuersio, de quo in sequentibus con  
sequetur.

Vsualis est spaciū dierum Calendarijs nostris  
inscriptum, & ab antiquis autorizatum.

Sciendum igitur quod inter Latinos, Romulus  
primus menses distinxit & annos. In anno suo de  
cem menses constituens, quoniam uidit quod tan  
tum tempus suffecit mulieri prægnanti ut pareret:  
Vel quia per tantum tempus debuit mulier abstinere  
à nuptijs post mortem mariti sui.

Primum igitur mensem Martium à Marte pa  
tre suo denominauit, uel à Marte, hoc est, à bello.  
Tunc enim reges Romani procedere solebant in  
expeditiones.

Mensem secundum Aprilem ab aperiendo ap  
pellauit, tunc enim pori terræ & arborum ape  
riuntur, & procedunt herbæ & folia in arbori

bus, uel Aprilis quasi Aphrilis ab ἄφρος, quod  
est spuma maris, de qua Venus nata fingitur, quæ  
fuit principium generationis Romuli, ex parte ma-  
tris suæ. Tertium mensem Maium à maioribus ap-  
pellauit. Quartum Iunium à iunioribus. Menses  
uero sequentes appositis dictionibus numeralibus  
appellauit, ut Quintilem, Sextilem, Septembrem  
Octobrem, Nouembrem, Decembrem, Vnde Oui-  
dius.

Martis erat primus mensis, Venerisq; secundus,  
Hæc generis princeps, ipsius ille pater.

Tertius à senibus, iuuenum de nomine quartus.

Quæ sequitur numero turba notata suo est.

Sed postea sequens Nama Pompilius duos adie-  
cit menses, scilicet Ianuarium & Februarium, Vnde  
Ouidius.

At Numa nec Ianum, nec auitas præterit um-  
bras,

Mensibus antiquis præposuitque duos.

Ianuarius dicitur à Ianua, quia quemadmodum  
per ianuam fit introitus in atrium, ita per Ianuariū  
in annum: Vel dicitur à Iano bicipite, qui Deus  
mercatorum dicebatur. Ita enim Ianuarius duplicē  
habet respectum, quia ad ipsum annus terminatur,  
& ab ipso incipitur.

*Februarius uero dicitur à Februo, id est, à Plu-  
tone, quia tunc solebant Romani sacrificia facere  
Plutoni & Dijs infernalibus, pro animabus an-  
tecessorum suorum. Vel dicitur à febre, tunc enim  
in calidis regionibus homines febricitare consue-  
uerunt.*

*September dicitur, quasi septimus ab imbre,  
hoc est, à tempore pluuioso, sicut à Februario, simi-  
liter est de alijs.*

*Licet igitur Numa annum ex duodecim men-  
sibus fecerit, diminute tamen egit, quoniam men-  
ses assumpsit lunares. Vnum scilicet. 30. dierum,  
& alium 29. dierum. Vnde annus eius constabat  
ex. 354. diebus, qui numerus dierum non sufficit  
kursui solis. Sequens igitur Iulius Cæsar ultimam  
Calendario apponens correctionem, undecim dies  
adiecit, & quadrantem. Vnde annus Iulij consta-  
bat ex 365. diebus & sex horis. Superflue tamen  
partem duodecimam unius horæ assumpsit, ut infe-  
rius patebit. Calendarium etiam à Martio iussit in-  
choari, Vnde Ouidius,*

*Qui Ianum sequitur ueteris fuit ultimus anni,  
Tu quoque sacrorum Termine finis eras.*

*Et dies anni inter menses numero competi di-  
stribuit, ita quod mensibus imparibus dies. 31.  
mensibus uero paribus. 30. attribuerentur. Sed*

cum ad ultimum mensem imparitatis, Ianuarium  
scilicet peruenisset, defuit unus dies. Vnde à Fe-  
bruario subtraxit unum diem ad completionem  
numeri dierum Ianuarij, quem recuperaret Febru-  
arius in anno bisextili. Tempore autem Iulij Cæ-  
saris, Romani adulantes Iulio, mensem prius di-  
ctum Quintilem, Iulium appellauerunt, quia in  
tali tempore dicitur fuisse natus. Similiter tempo-  
re Augusti, mensem prius dictum Sextilem, Au-  
gustum appellauerunt. Sed tunc inuidens Augu-  
stus mensem suum mense Iulij breuiorem esse, diem  
unum à Februario surripuit, & Augusto addidit,  
Vnde remansit Februarius. 28. dierum. Aliud insu-  
per accidit inconueniens, tres menses simul esse. 31.  
dierum, Iulium scilicet, Augustum, & Septembrē.  
Vnum igitur diem remouens à Septembri, eum  
Octobri attribuit. Similiter unum à Nouembri, quē  
Decembri addidit. Hac itaque mēsum ordinatio-  
ne, & numeri dierum positione, licet reprehensibi-  
lis fuerit, usque hodie utitur Ecclesia.

Per quam autē literam quilibet mensis incipiat,  
& in qua per consequens terminetur, in his patet  
uersibus.

Altitonans, dominus, diuina, gerens, bonus, extat,  
Gratuito, cœli, fert, aurea, dona, fidei.


Primæ enim literæ harum duodecim dictionum,

ostendunt literas inchoatiuas mensium, habito in-  
itio à Ianuario. Qui autem menses usuales plures  
habeant dies, & qui pauciores, scitur in his uer-  
sibus,

Sep. No. Iun. Ap. triginta dato, reliquis magis  
uno.

Ni sit Bissextus Februus minor esto Duobus.

IN quolibet quidem mense dicitur sol intrare  
nouum signum, & ut notabilius dicatur, circa  
medium mensis, prout præsens sensui subijcit fi-  
gura.



Est autem signum certa zodiaci portio duode-  
cima, ab Astronomis distincta. Gradus autem est  
tricesima signi portio. Nomina igitur signorum  
ordinatio & numerus in his patent uersibus.

b iij



Sunt Aries, Taurus, Gemini, Cancer, Leo, Virgo,  
Libraque, Scorpius, Arcitenens, Caper, Amphora  
ra, Pisces.

Vnde si in quo gradu cuiuslibet signi sit sol scire  
uolueris, numero dierum mensis præteritorum ad-  
de. 15. & si resultent. 30. uel minor numerus, in ta-  
li gradu signi ad mensem pertinentis est Sol. Si ue-  
ro maior, abijciantur. 30. pro signo mensis, &  
quot fuerint in residuo, in eo gradu signi sequentis  
est sol. Nam signum detur mensi quem fine mere-  
tur. Quod autem signum cui mensi pertineat, in  
his patet uersibus.

Ap. Aries. Ma. Tau. Iu. Ge. Iul. Can. Au. Leo.  
Sep. Vir.

Octo. Libra. No. Scor. De. Sa. Ian. Capricor. Feb.  
A. Mar. Pis.

Hæc tamen regula non penitus penes ordinatio-  
nem mensium, quæ nunc est, sed quæ esse deberet  
attendatur.

### A R I E S.

Primum igitur signum est Aries, quoniam se-  
cundum quod credit Ecclesia, in eo factus est sol.  
Licet dicant Arabes, quod factus sit in Leone.  
Et dicitur Aries, quoniam quemadmodum Aries  
est animal quod in parte anteriori uiget, in po-  
steriori uero debile est, ita sol existens in illa par-

te zodiaci, quæ Aries dicitur, in tempore hyemali parum habet uirtutis, scilicet caloris & siccitatis, in parte anteriori magis, scilicet uersus æstatem. Velut dicitur, Aries tota hyeme sinistro lateri accumbit, æstate uero dextro, Siquidem sol tota hyeme accedit ad inferius hemisphærium, æstate uero ad superius, quod est, quasi latus mundi dextrum.

#### T A U R U S.

Secundum signum Taurus dicitur, quia tunc labores Taurorum siue bouum apparent: uel quia sicut Taurus est animal fortius Ariete, ita sol in eo signo existens, fortior est in uirtutibus suis, uel qualitatibus, quàm fuit in Ariete.

#### G E M I N I.

Tertium signum est Gemini, quoniam tunc geminatur uirtus solis in caliditate & siccitate: uel quia sicut Gemini depinguntur, iuuenes amplectentes se, ita quando sol est in illa parte cæli, quædam terræ nascentia amplectuntur se, & pubescunt per radicem superius in herbam.

#### C A N C E R.

Quartum signum Cancer dicitur. Sicut enim Cancer est animal retrogradum, ita sol existens in illa parte zodiaci, à nostro recedit Hemisphærio, unde signum illud dicitur Tropicum, quasi

conuersium, in eo enim fit Solstitium æstiuale.

### LEO.

Quintum signum Leo dicitur, quia sicut Leo est animal ardentissime naturæ, & implacabilis ira, ita sol existens in illa parte cœli ardentissimus est & siccissimus. Vnde tunc non est bonum minui, nec purgationibus uti, propter defectum humoris in tempore caloris & siccitatis, Sicut innuit Hippocrates, sub cane & ante canem, sunt molestæ purgationes. Sunt enim tunc dies Caniculares, quorum initium & terminus sic habentur, Iulius à Nonis inducit Caniculares, Septembris gaudens deca sexto fine Calendas.

### VIRGO.

Sextum signum est Virgo. Sicut enim Virgo sterilis est, & nihil in esse producit, ita tempus illud dum sol est in Virgine, sterile est, & nihil producit, sed producta maturat.

### LIBRA.

Septimum signum est Libra, quoniam tunc librantur dies artificialis, & nox, & est æquinoctium autumnale.

### SCORPIVS.

Octauum signum Scorpius dicitur. Sicut enim Scorpius cum cauda pungit, ita Matutina parum cautos tunc frigora lædunt.

## SAGITTARIVS.

Nonum signum dicitur Sagittarius. Tunc enim in nos mittuntur sagittæ temporis, tempestates scilicet, imbres, grandines & huiusmodi.

## CAPRICORNVS.

Decimum uero signum Capricornus dicitur, quia quemadmodum Caper in pascendo erigit se, ita Sol tunc ab inferiori hemisphærio uersus nostrum hemisphærium ascendit. Vnde hoc signum Tropicum, quasi conuersiuum dicitur. Est enim tunc solstitium hyemale, & de cætero sol conuertitur ad nos.

## AQVARIVS, PISCES.

Residua uero duo signa, scilicet Aquarius & Pisces, abundantiam aquarum notant. Dicitur enim Aquarius ab aquosa qualitate aëris. Pisces uero quia in pluuijs omnia natare uidentur. Quidam tamen dicunt, quod hæc signa à situ stellarum in illis partibus ad modum huiusmodi animalium sic denominantur. Vnde Macrobius, Sydera in signum plurimum stellarum compositione formantur. Et Lucas de Ariete dicit,

Sed postquam uernus calidum Titana recepit  
Sydera respiciens delapsa portitor Helles.

Qualitates autem omnium signorum, per quatuor triplicitates distinctorū, in his uersibus patent.

Igneæ sunt a, leōque ſa. Terrea tau, caper, & uir.  
Vda ge, li, & a, ſeruēt. Cancer, aquatica, Scor, pis.

Q V I D C A L E N D A E, N O -  
n æ, & I d u s.

N O t a n d u m e t i a m q u o d i n q u o l i b e t m e n ſ e  
ſunt tres dies, denominatiōes ſortiti prin-  
cipales, à quibus, aſſumptis dictiōibus  
numeralibus, omnes cæteri dies denominantur ſcili-  
cet Calendæ, Nonæ, & Idus. Dicuntur autem Ca-  
lendæ, quaſi colendæ. Primus enim dies cuiuslibet  
menſis colebatur ab antiquis in honore Iunonis,  
Vnde Ouidius,

Vendicat Aufonias Iunonis cura Calendas.

Vel dicuntur Calendæ à καλῶς quod eſt uoco.  
Præco enim primo die cuiuslibet menſis, aſcēdebat  
locum eminentem in ciuitate, & clamabat quater  
καλῶς uel pluries, ſecundum quod nundinæ per  
plures in menſe ſequenti durarent dies, & ideo in  
plurali numero dicuntur Calendæ.

Vel dicuntur Calendæ à καλῶς, quod eſt bonū,  
eo quod in primo cuiuslibet menſis die ſolebant  
ab amicis mutuò dari quædam dona, ut per totum  
menſem ſequentem bonum omen eis eueniret.

N O N A E dicuntur à non. nullus enim Deus ha-

buit festum in nonis, Vnde Ouid.

Nonarum tutela Deo caret &c.

Vel dicuntur Nonæ quasi nouæ, propter statuta renouata in singulis mensibus apud Romanos. Vel dicuntur nonæ à nundinis, per tot enim dies durare solebant, quot erant nonæ. IDVS uero dicuntur, quasi diuisiones, diuidunt enim mensem ferè in duas partes æquales, uel quia tunc diuebantur nundinæ.

Ab istis autem diebus coassumptis dictionibus numeralibus, denominantur alij dies mensis, ita quod maiori numero, secundum quod magis antecedunt, minori secundum quod minus. Si igitur queratur, quare non dicatur secundo Calendas, Nonas, & Idus: Dicendū, quod hæc dictio secundus prouenit à uerbo sequor, unde sequi deberet dies ille, si rectè diceretur secundus, sed ibi benè dicitur pridie Calendas, id est, priori die ante Calendas.

Quilibet autè mēsis octo habet Idus, Vnde uersus  
Octo tenent Idus menses generaliter omnes.

Sed quidam menses plures habent nonas, quidā pauciores habent nonas, Vnde uersus,

Mar. Ma. Iul. Oc. senas, reliquis dato bis duo nonas.

Habito igitur quot dies habeat quilibet mensis, sicut ex prædictis patet, & quot Nonas & Idus, subtrahitis Nonis & Idibus, reliqui omnes erunt Calende.

Notandum etiam quod in quolibet mense, sunt duo dies, qui dicuntur ægri, mali, & ægyptiaci: Aegri ab effectu. Secundum enim opinionem quorundam, si quis in his ægrotaret diebus, uix uel nunquam euaderet: Mali, quia malum erat incipere aliquod opus in his diebus, propter malas eorum cōstellationes: Aegyptiaci, quia ab Aegyptijs erant inuēti. Præter enim decem plagas notas, quæ in his breuiter habentur uersiculis.

Sanguis, rana, culex, muscæ, moriens pecus, ulcus,

Grando, locustæ, nox, mors prius orta necans: contigerunt eis plurima mala, ita quod bis in mense quolibet, sicut in Calendario notatur, quidam etiam in his diebus humanum sanguinem Plutoni sacrificabant. Vnde prohibitum est ne quis in his diebus sibi minuat, ne uideatur sacrificare dæmoni. Observationes tamen istorum dierum inhibet Augustinus, dicens, Calendas mensium, & dies ægyptiacos non obseruetis, sed quia à uulgo sunt suspecti, Ad illos habendos sciantur isti quatuor uersus.



Armis Gunst, dei Kalatos, adamare dabatur,  
Lixa memor, conflans gelidos, infancia quosdam,  
Omine limen, Aaron bagis, concordia laudat,  
Chijæ Linkat, ei coëquarta, gearchalisardus.

Istorū uersuum singulæ binæ dictiones, singulis  
seruiunt mensibus, initio sumpto à Ianuario. Si igitur  
primum diem ægyptiacum alicuius mensis ha-  
bere uolueris, computentur tot dies, à principio mē-  
sis illius descendendo, quota est litera prima præ-  
cedentis dictionis in alphabeto, & ubi terminatur  
talis computatio, ibi est dies ægyptiacus, & quo-  
ta fuerit prima litera secundæ syllabæ eiusdem di-  
ctionis in alphabeto, talis hora illius diei est suspe-  
cta. Ad habendum autem secundum diem ægyptia-  
cum eiusdem mensis, computentur tot dies à fine  
mensis ascendendo, quota est prima litera sequen-  
tis dictionis in alphabeto: & quota fuerit prima li-  
tera secundæ syllabæ eiusdem dictionis in Alpha-  
beto, talis hora eiusdem diei est suspecta. Hoc etiam  
prænotato, quod, h, non computatur pro litera.

## DE ANNIS.

Nnorum autem alius planetarum singu-  
**A** lorum discretus, alius omnium commu-  
nis, qui annus mundi, siue perfectus spe

cialiter nuncupatur.

Discretus est spacium temporis, quo quilibet planetarum zodiacū completè peragrat. Est autē zodiacus firmamenti cingulus, planetarum uia, stellis fixis, signorum distinctio. Vnde Saturnus omnium planetarum supremus signiferum 30. annorum spacio peraggt. Deinde Iouis sydus temperatum annis. 12. ipsum complet. Mars uero; tertius annis duobus circuit. Medius autem omnium planetarum Sol. 365. diebus, & quadrante zodiacum percurrit. Infra Solem Venus est, quæ & Lucifer & Vesper dicitur, temporibus tamen diuersis. Illi quidem Mercurius proximus est, qui modo ante Solis ortum, modo post eius splendescit occasum, qui duo pari temporis spatio, minimò uenit nus sole, signiferum circumuehūt. horum enim trium ordinem motus uicinitas confundit. Luna uero omnium nouissima. 27. diebus & tertia parte diei per signiferum confuggt, deinde biuò in Solis comorata coniunctione, nusquam in firmamento apparet, ultra cuius regionem nihil temporis subiacens immutationi transcendit. Est enim sex superiorum, puritas uero inferiorum, diuinorum caducorumq; medium interstitium. Vnde Claudianus, Lunari subiecta globo qui septimus auras Ambit, & æternis mortalia separat astris.

Luna in conuolutione solis existens, per biuū non apparet;

Magnus autem annus est spacium temporis, in quo planetae omnes simul cum stellis fixis firmamēti uniuersis ad loca, quae in prima origine mundi tenuerunt, reuertuntur, de quo Iosephus sic meminit, Nullus ad uitam modernam & annorum nostrorum breuitatem uitam comparans antiquorū, falsa putet eorum scripta, quae nunc haud ediscere posset, si sexcētos uiueret annos. In tot enim annorum circulis magnus completur annus. Sed philosophorum uerior existit sententia, qui magnum annum. 15000. annorum summa definiūt, qui est annus totius mundi. Vnde uersus,

Millia ter quinque mundus complectitur annos,  
Vt Plato testatur, quos magnum nuncupat annū.  
Ex his bis centum, minus uno millia quinque,  
Præcessere tuæ noua legis uempora Christe.

Veruntamen annus mundi perfectus 36000.  
Solis reuolutiones ex eiusdem ratione subsultantibus, continere uidetur.

## DE ANNO SOLARI.

Ubi itaq; multiplex sit annus, ex ceteris omnibus omiſſis duo specialiter à cōputista intendantur, scilicet Solaris & Lunar. de digniori prius est pertractandum,

*Annus Solaris*

Scilicet de Solari. Est igitur annus solaris spacium temporis, quo Sol à quocunque quatuor punctoꝝ zodiaci, equalitatis uel conuersionis, mouetur, circumiens totum Zodiacum motu proprio, rediens iterum ad idem punctum. Vnde apud antiquos solet depingi serpens deuorans propriam caudā sic, Serpens annus ego sum, Sol sic circinat in quo, Qui fluxit pridem, status est nūc temporis idē.



Cuius quidem reuolutionis, in 365. diebus, & quarta diei naturalis præter rem modicam secundum sensum perficitur. Neque defectus illius quantitatem, secundum ueritatem, propter diuersitatis

paruitatem possibile est inueniri. Sicut in Almage-  
sti dictione tertia à Ptolemæo reperitur. Hoc etiam  
sciolis computistarum suæ licet professioni aduer-  
santibus sensibilibus ex eius causa congruit demō-  
strari. Est itaque solis motus in die uno naturali.

59. minuta. 8. secunda. 17. tertia. 13. quarta. 12.  
quinta, & 31. in sextis, ut huiusmodi quippe mi-  
nutorum in fractionibus ad sexta perueniat, nunc  
sufficit partitio. Qui quidem motus si zodiacum  
in sexta redactum, tum in toto tum in parte, prout  
competit, mensuret, prædictis. 6. horis non ex toto  
unius duodecima deficiet, Vnde uersus,

Quis scidit Eudoxum superatur Cæsaris annus.

Hæc itaque anni Solaris quantitas si per. 12.  
diuidatur, erit mensis solaris. 30. dierum, & 10.  
horarum, & 29. minutorum, & 36. secundorum.  
Dicitur autem annus ab innouatione cunctorum  
uegetabilium, quæ temporum uicissitudine natu-  
raliter præterierunt, uel ab an, quod est circum,  
& eo is propter prædictam temporis reuolutio-  
nem.

Notandum igitur quod secundum diuersos, di-  
uersa sunt anni principia. Numa enim Pompili-  
us annum suum incepit à Solstitio hyemali, quo-  
niam tunc ad nos Sol ascendere incipit, Vnde O-  
uidius,

*solis motus  
in die natu-  
rali,*

*Mensis sol-  
is,*

Bruma noni prima est, ueterisq; nouissima solis.  
Principium capiunt Phœbus & annus idem.

Romulus uero annum incepit à Martio, iuxta  
æquinoctium Vernali, quia tunc omnia uirent &  
florent. Secundum Theologiam autē annus à Mar  
tio dignè inchoari uidetur. Cum mundus factus sit  
15. Calendas Aprilis. Itē præcepto domini in Exo  
di. 12. de Martio dicentis, Mensis iste primus erit  
in mensibus anni. Vnde uersus,  
Omnia cum uireant tunc est noua temporis ætas:  
Sic annus per uer incipiendus erit.

Arabes uero annum incipiunt à Solstitio æstiu  
li, quorū opinio est, solem factum fuisse in Leone,  
Quidam autem annum incipiunt à Septembri,  
iuxta æquinoctium autumnale, quemadmodum  
Iudæi, propter illud Genesis, Protulit terra her  
bam uirentem, facientem fructum iuxta genus  
suum. sed autumnus est tempus fructuosum, unde  
ibi uolunt annum incipere, cum à fructibus suis  
annum ueterem spoliauerunt. Istorum autem om  
nium principia imitamur in aliquibus, & in ali  
quibus mutamus. Nam clauēs terminorū, aure  
um numerum, & literam Dominicalem incipi  
mus à Ianuario: concurrentes & regulares so  
lares à Martio, à Septembri uero Epactas & re  
gulares Lunares, & secundum quosdam Embo

lismos. Vnde uersus,  
Aureus in Iano numerus, Clauēsq; nouantur,  
Littera sic Domini nouat, & bisextus eandem.  
Mars concurrentem renouat, September Epactas.

DE MUTATIONE FERIARVM  
in singulis annis, & singulis mensibus  
annorum.

Vnt quidem in anno. § 2. Septimanæ, &  
S unus dies, & quarta ferè dici, prout in  
prædictis innuitur. Dies igitur iste resi-  
duus uariat septimanas, & est causa, quare festa Sã-  
ctorum & litera dominicalis singulis annis uarian-  
tur, & quod Calendarium in A. incipit, est origo  
concurrentium, sed cum nullus dies sit extra septi-  
manam, dies iste pars erit septimanæ sequentis, &  
sic anni initium. Vnde per septimanas compu-  
tando integras, in tot diebus fit anni anticipatio  
quotus est concurrens. Sic igitur annus Cycli ulti-  
mus. § 3. continet septimanas. Quod autem festa  
Sanctorum per istum diem uariantur, sic patet. Si  
festum aliquod in hoc anno fuerit in die domini-  
co, in anno sequenti idem erit in die Lune: & si  
Bisextus fuerit, in die Martis. Hæc eadem uari-  
atio est per singulorum mensium Calendas. Vnde



ad habendum generaliter & artificiosè quota feri-  
ria quilibet mensis incipiat, inuenti sunt duo nume-  
ri, Concurrrens scilicet & Regularis solaris.

*Numerus  
concurrrens*

EST AUTEM CONCURRENS nu-  
merus, septenarium non excedens, proueniens ex  
superabundantia anni diuisi per septimanas. Nu-  
merus dico largè, ut unitas numerus appelletur,  
quoniam quandoque unitas est Concurrrens. Non  
excedens septenarium dico, quia Concurrrens sep-  
tem non transsit, sed petit assem. Cum enim sep-  
tem sint feriæ tantum in septimana, & Concur-  
rens cum regulari habeat ostendere primam feriã  
mensis, neuter eorum excedet septenarium. Proue-  
niens ex superabundantia dico, quoniam ille dies,  
qui relinquitur ultra septimanas in anno, est causa  
concurrentis.

Primus igitur annus Cycli solaris unitatem ha-  
bet, pro Concurrente. Secundus binarium. Ter-  
tius ternarium. Quartus, quinarium, uno die su-  
peraddito propter bisextum. Quintus senarium.  
Sextus septenarium. Septimus unitatem. Octa-  
uus ternarium propter bisextum. Et eodem modo  
computandum est, donec perueniatur ad 28. annũ,  
ubi septenarius est concurrrens, & est annus bisex-  
tilis. Postea uero redibit penitus idem status, in for-  
matione concurrentium, unde & spaciũ. 28. an-

*Cyclus  
concurrentium*

norum, dicitur *Cyclus concurrentium*. Per hos autem uersus scitur quis numerus sit concurrent in quolibet anno *Cycli*.

Quam *Feriam Martis* *F.* littera significabit, Illius in numero concurrentis seruiet anno.

Vide enim quota feria significetur per primum *F.* in *Martio*, & talis est concurrent illius anni. Vel sic.

Sex habet *A*, *B* quinque tenet, *C* quattuor, & *D* 1. 2. 3.  
Tres habet, *E* que duas, *F* unum, *G* quoque septē. *F.* *E.* *D.*

Quoties enim *A.* est littera *Dominicalis*, senarius est concurrent, quoties *B.* *quinarius*, & ita 4. 5. 6.  
deinceps. Dicitur autem concurrent à con, quod est 7.  
simul, & currere, quoniam simul currit cum regu G.  
lari, ad ostendendum quota feria quilibet mensis incipit.

**REGULARIS** solaris est numerus, septenarius non excedens, qui adiunctus concurrenti, primas ferias mensium indicat. Numerus dico, ut prius. Non excedens septē dico, ut prius. Sed istud membrum, qui adiunctus &c. ostendit tam officium concurrentis, quàm regularis. Habet autem nunc, & semper habebit quilibet mensis tot pro regulari, quota feria incepit à principio mundi. Mundus autem factus est. 15. *Calendas Aprilis*, unde ibi solet notari primus dies sæculi, & sol in

*Regularis numerus*

**Arietē.** Vnde uersus,

**Principium mundi renouat G. tertia Martis.**

Constat quidem quod primus dies seculi, fuerit dies Dominicus. Illa igitur G. fuit litera dominicalis. Supposito itaque per totum annum sequentem, quod G. sit litera dominicalis, patet quia se-  
ria menses incipiant, & sic per consequens pa-  
tent regulares. Habet autem Martius quinarium  
pro regulari, tanquam habuisset omnes dies suos  
integraliter. Vel regularis Martij, prouenit ex  
numero. 4. dierum, remanentium ultra diuisionem  
dierum anni, intra singulos menses, per. 30.  
factam. Habito igitur uno regulari, scilicet Mar-  
tij, sic per artem formari possunt omnes aliorum  
mensium regulares. Numero dierum Martij, iun-  
ge eius regularem, & ab illis simul iunctis subtra-  
hatur septenarius, quoties poterit, & remanebit  
unitas, quæ est regularis Aprilis, & similiter fa-  
ciendum est de omnibus alijs mensibus. hoc etiam  
prænотato, quod si nihil sit residuum, septenarius  
erit regularis mensis subsequētis. Per hos autem  
uersus sine labore possunt haberi omnium mensium  
regulares.

**Quinque No. Mar. Iu. Fe. Sex. A. Iul. assē. sep.**

**Dēque septem,**

**Oc. duo, Ma. Ia q̃ tres habet, Au. duo bis regulares**

Habitis igitur concurrente, & regulari, simul iungantur, & si ex eorum coniunctione resultet septenarius, uel minor numerus, à tali feria incipit mensis, cuius regularem sumpsisti. Si autem maior, reijce septem, & quotus erit numerus residuus, à tali feria incipit mēsis, cuius regularis sumebatur. Vnde uersus,

Dant feriam mensis concurrens & regularis.

Cum plus sit septem, reliquum cape, reijce septem.

Dicitur autem regularis, quia regulariter cum concurrente primam feriam mensis ostendit: Et dicitur solaris ad differentiam regularis lunaris.

#### De anno Bisextili.

Ex autem horarum diem bisextilem integran-  
S grantium nunc restat assignatio. Est autē bisextus, in Februarium, quarto anno Cycli solaris (ut cursui Solis tempus adæquetur) dici unius interpositio. Sunt enim in anno solari. 365. dies, & .6. horarum fere integritas, prout in prædictis manifestatur, gratia tamen confusionis uitandæ completè supponuntur.

Quoniam igitur difficile esset, has .6. horas cuilibet anno continuare, ita quod nunquam in diem redactæ, alicubi ponerentur. Nam secundum

hoc, si annus præcedens incipiat à mane, secundus à meridie, tertius à uespere, quartus à media nocte inciperet. Quare prouisum est, quod sex horæ excedentes in primo anno, & sex in secundo, & sex in tertio, reseruentur ad sex horas quarti anni. Vnde sic in anno quarto dies unus, ex quater sex horis colligitur. Iste igitur dies ita particulariter collectus, interponitur in Februario, quoniam mensium breuissimus est, & secundum rationes prædictas, ultimus. Et quoniam quando est annus bisextilis, in Ecclesijs Cathedralibus legentes in Martyrologio, bis pronunciant sexto Calēdas Martij, duos dies ponentes super eandem literam, ideo bisextus dicitur. Duo igitur dies cum super eandem F. computentur, in sequenti die debet celebrari festum beati Mathiæ apostoli. Vnde uersus,

Bissexturn sextæ Martis tenuere Calendæ,  
Posteriori die celebrantur festa Mathiæ.

Ratio autem quare in eo loco intercaletur bisextus, est hæc. Senarius est primus numerus perfectus, & illo die est quasi perfectio anni. Vnde interponitur die denominato, à numero perfecto, & non in ultimo, ne festum Terminis mobilitaretur.

Numerus autē perfectus est, cuius partes aliquotæ simul aggregatæ, ipsum numerum præcisè perficiunt. Et hac ratione dici potest, quod in Februa-

rium interponitur, cum dies eius in secūdo numero  
perfecto consistant.

Vtrum autē annus sit Bisextilis, nec ne, sic scitur.  
Numerus annorum Domini ab eius natiuitate in  
ceptorum per. 4. diuidatur, & si non residuum  
præsens annus est bisextilis: Si autem residuum  
siue. 1. siue. 2. siue. 3. ostendit annum post bisextū,  
Vnde uersus.

Tunc bissextus erit, partes per quattuor æquas  
Annos partiri cum poteris Domini.

Notandum est etiam quod nisi bissextus ob-  
seruaretur in. 364. annis, contingeret natale Do-  
mini in tam longis diebus celebrari, sicut nunc  
celebratur Annunciatio Domini, quod sic patet:  
In tot annis, cum quartus sit semper bisextilis,  
contingunt. 91. dies, qui numerus est quarta pars  
364. dierum, sed ex. 91. diebus possunt perfici tres  
menses, duo scilicet. 30. dierum, & unus 31. die-  
rum. Et isti tres menses sunt quarta pars anni,  
quæ si esset subtracta, contingeret prædictum in-  
conueniens, uel fortè peius, scilicet, quod natale  
Domini celebraretur, ubi nunc celebratur festum  
Ioannis Baptiste, quod patet consideranti, si du-  
plentur anni.

DE CYCLO SOLARI, ET  
INVENIENDA LITERA  
Dominicali.

V Iso quid sit concurrrens, quid Bi-  
sextus, sequitur de Cyclo solari,  
qui est quasi istorum annorum effe-  
ctus. Est igitur Cyclos solaris reuo-  
lutio temporis, in qua consideran-  
tur omnes uariationes, quæ fiunt in anno solari,  
per concurrentem & bisextum. Et completur ille  
Cyclos, quando ultra septimanas integras nihil  
est residuum, de diebus excrescentibus, ultra an-  
num hebdomaticum, qui sunt causa concurren-  
tium, nec de horis excrescentibus singulis annis,  
ultra dies anni, ex quibus provenit bisextus, &  
illud spatium est 28. annorum, quoniam in tanto  
tempore complentur omnes istæ uariationes, &  
quodlibet festum per quamlibet feriam uariatur,  
& bisextus in qualibet feria contingit, & ita in  
toto Cyclo ex diebus bisextilibus integratur una  
septimana, sicut patet depingenti Cyclum solare  
& tabulam concurrentium.





Cum autem Cyclus sit circulus, & in circulo cōtingat, ubicunq; uolueris, principium assignare, nō est mirandum, si Cyclus solaris, secundum diuersos diuersa habeat p̄incipia. Discretio igitur Cycli solaris secundum ueritatem & utilitatum considerationem, in his habetur uersibus,

Fons est dans bis agro, Pūdus cibat, aufer edacem.  
Augens fert escas, bos aut gens, edacibus glans.

Istorum uersuum singulae syllabae singulis annis Cycli solaris per ordinem deseruiunt, prima primo, secunda secundo, & ita deinceps.

Prima igitur utilitas horum uersuum est, ut sciatur litera Dominicalis. Quae enim litera est inchoatiua syllabae, Dominicalis erit per totum annum, cui deseruit illa syllaba, nisi bisextus fuerit. Si autem fuerit bisextus, litera illa Dominica

lis erit per decem menses, sumpto initio d. Martio.  
& litera quæ signatur extra, fuit litera Dominica  
lis per Ianuarium & Februarium, usque ad locum  
bisexti.

Secunda utilitas est, ut sciatur, quod habita li-  
tera Dominicali, statim per hunc uersum habetur  
Concurrents.

F.E.D.C.B.A G. concurrentes posuere.

Quoties enim F. est litera dominicalis, unitas est  
Concurrents, quoties E. binarius, & ita de alijs,  
obseruato ordine literarum positarum in uersu.

Tertia utilitas est, ut sciatur, utrum annus sit  
bisextilis, nec ne. Sumantur igitur in septem digitis  
duarum manuum, ita quod primus annus Cycli sit  
in radice indicis sinistrae manus, secundus in iunctu-  
ra proxima, tertius in superiori, quartus in summi-  
tate indicis, quintus in radice maioris digiti, & ita  
ascendēdo, donec compleatur Cyclus. Dico igitur  
quod in septem summitatibus sunt septem anni bi-  
sextiles, in radicibus uerò primi anni, post bisexti-  
& sic deinceps.

Hoc etiam scitur per tale Abecedarium retro-  
gradum G.F.E.D.C.B.A. Quoties enim in su-  
pradictis uersibus transilitur aliqua litera istius  
Abecedarij, tunc est annus bisextilis, & litera per  
transita, erit litera Dominicalis, per duos menses,

sicut prædictum est. Litera uero prima syllabæ sequentis, ubi factus est transitus, erit litera Dominicalis per decem menses. Litera itaque bisextilis, in septem annis bisextilibus, ex quibus in toto Cyclo una colligitur septimana, in hoc habentur uersu.

Constans est genitor, bona donat, fertilis autor.

Cyclus uero solaris, secundum Dionysium, non incipit ab eo anno quem nos cum Gerlando constituimus principium, sed à duodecimo illius, ubi F. est litera Dominicalis, & unitas concurrens, quemadmodum in primo anno, sed est annus bisextilis, cuius quidem descriptio his uersibus continetur.

Fallitur Eua dolo, cibus Adæ gaudia finit,

Et cum botrus adhuc germinet, Eua dolet.

Christus bella gerit, finitur eo duce bellum,

Ad grauidam fit dux, cuncta beauit Aue.

Eadem enim est ars in istis, quæ in superioribus, Sed hic per dictiones, ibi per syllabas, & habent initium à summitate indicis, per annum bisextilem, discurrendo per summitates & iuncturas digitorum, ut prius. Et prima litera dictionis, Dominicalis erit, ut prius.

Hoc autem artificio scire possumus, in quoto anno Cycli sumus, quoad eius ordinationem natu

ralem, & usum Ecclesiæ. Addantur annis domini.  
20. nam Vigeno primo Christus natus fuit anno,  
& tota summa per. 28. annos diuidatur. facta igitur  
diuisione, si nihil est residuum, sumus in ultimo  
anno Cycli: si autem est residuum, ostendit nobis in  
quoto anno Cycli simus. Sed si in quoto anno Cy-  
cli, secundum Dionysium simus, scire uolueris, annis  
domini addantur nouem.

Nam decimus solis, Christo nato fuit annus  
Errans, in Cyclo fert ut Dionysius Abbas.

Et totum per. 28. diuide, ut prius, & patebit  
quæsitum.

#### DE QUATVOR TEMPORIBVS

Anni, nempe Vere, Aestate, Autumno  
& Hyeme, & de Ieiunijs.

Um autem generalis temporis permuta-  
C tio præcipuè à Sole fiat, cuius appro-  
pinquatio calefacit, mora uero uicinita-  
tis desiccet, remotio quidem infrigidat, sed mora re-  
motionis humectat, secundum eius approximationem,  
elongationem, uel mediocrem quoad nos consisten-  
tiam, quatuor distinguuntur anni tempora, scilicet  
Ver, Aestas, Autumnus, & Hyems.

Est enim tempus anni, in quacunque quatuor  
quadrarum zodiaci, puncto uel solstitiali uel æqui

noctij inchoata, solis peragratio. Ver autem dicitur à uireo uires, quia tunc omnia uirent & florent. Aestas dicitur ab aestu, id est, seruore. Autumnus dicitur à bonorum anni augmentatione, uel ab autumnus, quod est idem, quod morbidū uel tempestuosum. Est enim tempus frigidum & siccum. Hyems dicitur ab ἡμί, quod est dimidium. Vulgus enim diuidit annum in hyemem & astatem, large appellās hyemem anni medietatem. Istorum quidē quatuor anni temporum qualitatibus, quatuor mūdi regiones, quatuor uenti cardinales, quatuor Elementa, quatuor corporis humores, & quatuor hominis etates, complexione conuertūtur, prout in subiecta clarescit figura.

	Calida & sicca	Calida & Humida	Frigida & humida.	Frigida & sicca.
Mūdi regio.	Oriens	Meridies	Occidens	Septentrio.
Venti Card.	Eurus.	Auster	Zephyrus.	Boreas.
Elementa	Ignis	Aer	Aqua	Terra.
Partes anni.	Aestas	Ver	Hyems	Autumnus.
4. humores	Cholera	Sanguis	Phlegma	Melanchol.
4. etates.	Iuuentus.	Adoleſcē.	Senium	Senectus.

De naturis autem reliquorum uentorum, iudicabis ex cognatione, quam habēt cū uentis cardina

libus, Cognatio autem sequentibus patet uersibus.  
Euro Vulturū, Subsolanusq; sodales,  
Aphricus atq; Notus Austro sunt collaterales.  
Et Zephyrum, Corus, Fauonius atq; sequuntur.  
Circius ac Aquilo Boream stipare feruntur.

Principia uero & terminationes quatuor anni  
temporum quo ad Ecclesiam, in his habentur uer-  
sibus.

Ver Petro datur: Aestas exinde sequitur,  
Hanc dabit Urbanus: Autumnum Symphorianus:  
Festum Clementis hyemis caput est orientis.

Secundum Astronomos uero per quatuor qua-  
dras zodiaci, ista distinguuntur tempora, Vnde uersus,  
Zodiaci caput est Aries, & ueris & anni,  
Aestatis cancer, autumnus pendula libra.

Incipit ex imo pluuiialis hyemis Capricorno.

Sed in quibus mensibus, & quoto die mensis ini-  
tium habeant, sic patet.

Martius à medio Ver ducit, Iunius Aestum.

Autumnum September habet, Brumamque De-  
cember.

Habet autem tam Aestas quam Autumnus. 91.  
dies. Hyemis uero. 92. propter diem imparitatis,  
ultra septimanas in fine Decembris assignatum.  
Ver quidem habebit. 92. dies, si bisextus fuerit, sin-  
autem non. 91. dies: quemadmodum Aestas & Ar-

tumini. In prædictis autem uersibus si non assignantur cuilibet parti tot dies, quot assignando iam diximus, hoc ideo contingit, quoniam principia & terminationes prædictarum anni partium, per festa notabiliora, uolunt notificari. Et circa eorum principia non sunt festa magis notabilia. Non igitur fiat uis in hoc, si unus uel duo dies unius partis, computentur cum diebus alterius partis.

In his quatuor temporibus, siue anni partibus sunt duo solstitia, & duo Aequinoctia. Dicitur Solstitium, non quia Sol aliquando stet, sed quia tunc est in maximo accessu ad Zenith capitis nostri, uel iterum in maximo recessu à Zenith capitis nostri. Zenith autem punctus quidam est firmamenti, capitibus nostris directè suprapositus.

Aequinoctium uerò dicitur, quando dies artificialis nocti adæquatur. In quibus igitur signis contingant solstitia, & æquinoctia, patet in his uersibus,

Hæc duo solstitia faciunt Cancer, Capricornus.  
Sed noctes æquant Aries & Libra diebus.

Est itaq; Solstitium hyemale, circa principium & introitum solis in Capricornum, scilicet in medio Decembris. Tunc enim Sol maximè recedit à Zenith capitis nostri, siue à nostro habitabili,



Solstitium uero æstiuale est circa principium Cancri, in medio Iunij. Sol enim tunc maximè accedit ad nostrum Zenith, in nostro habitabili. Cum autè sol recedens à primo puncto Capricorni, uenit ad locum medium inter utrumque Solstiorum, facit æquinoctium circa medium Martij, in principio Arietis. Et quoniã contingit in Vere, dicitur æquinoctium uernale. Sol uero discedens à Cancro uersus Capricornum, ueniet ad locum medium inter utrumque, & tunc facit Aequinoctium. Et quia cõtingit in autumno, dicitur æquinoctium autumnale, in medio Septembris, scilicet circa introitum Solis in Libram.

De certis quidem diebus Solstiorũ & Aequinoctiorum, dubium est apud modernos. Dixerunt enim ueteres, quod Sol intrat nouum signum. 15. Calendas alicuius mensis, unde uersus, Semper quindenis ponuntur signa Calendis.

Et octauo die post, dixerunt esse Solstitium, uel Aequinoctium. Vnde patet, cum Sol intret Capricornum. 15. Calendas Ianuarij, & octauo die post debet esse Solstitium, erit Solstitium hyemale, in die Natiuitatis Domini, scilicet. 8. Calendas Ianuarij. Similiter cum Sol intrat Cancrum. 15. calēdas Iulij, erit Solstitium æstiuale in die Natiuitatis beati Ioannis Baptistæ. Similiter est de æquinoctijs. Quo-

niam cum Sol intret Arietem. 15. calendas Aprilis,  
erit æquinoctium uernale, ubi notatur Annuncia-  
tio Domini, scilicet. 8. Calendas Aprilis. Cum Sol  
iterum intrat Libram. 15. calendas Octobris, erit  
æquinoctium autumnale, in die Conceptionis Ioan-  
nis Baptiste, scilicet. 8. calēdas Octobris. Sed quod  
solstitium hyemale fuerit in die sexto, tempore Nati-  
uitatis Domini, ante eius ortum æstiuale, sexto die  
ante Natiuitatem beati Ioannis Baptiste, ostendi  
per hoc uidetur, quod cursui Solis, plus temporis  
quàm debeat, attribuitur. Vnde & retrocedūt Sol-  
stitia & æquinoctia, Quantum enim ad ueritatis  
sensibilitatem, Sol moratur in quolibet signorum  
per. 30. dies, &. 10. horas, &. 29. minu. &. 36.  
secun. licet. 30. minuta minus completè una medie-  
tas horæ unius supponātur, prout in prædictis sen-  
sibiliter exprimitur. Vnde una centesima & quin-  
quagesima pars unius horæ, scilicet. 24. secunda,  
in omni superflue computantur signo. Et cum. 12.  
sint signa, erunt duodecies. 24. secūda, ex quibus  
in unum redactis, pars horæ duodecima conficitur.  
Sic igitur in. 12. annis, hora una integrabitur. Vn-  
de cum dies naturalis ex. 24. horis constet, in duo-  
decies. 24. annis, hoc est, in. 288. annis, dies unus  
naturalis superfluere reperietur.

Nunc igitur cum in die. 10. Solstitium hyemale

natiuitatem Domini, die natiuitatis cōputato, æstiuale Beati Ioannis Baptistæ, antecedit (quod diuersis lucefcit rationibus) & non nisi quater prædictus numerus ab annis Domini subtrahi possit, relinquatur quod tempore Natiuitatis Domini, & beati Ioannis in sexto die præcesserit Solstitium, & sic nunc est in decimo. Idem etiam respectu Annunciationis Dominicæ, & conceptionis Ioānis Baptistæ de æquinoctijs inuenitur, Vnde uersus, Solstitium decimo Christum præit atq; Ioannem. Nuncia sic matris nox æqua, diēmq; Ioannis.

Solstitiorum autem, & æquinoctiorum retrocessionis error. Calendario ordini restituto, saltem in die uitabitur. Si in postremo temporis istius anno, scilicet. 288. annorum, in fine Februarij dies unus surripiatur, uel decentius diei bisextilis prætermittatur appositio, qui ex diuisione annorum Domini per numerum prædictum cum nihil remanserit, percipietur. Hæc etiam eadem Lunæ primationem per plurima sæculorum spatia itidē in die stabiliret, subtractio. Vnde & hic ex huiusmodi diei subtractione annus decurtationis siue ex temporum æquationis iucunditate annus Iubilationis appellari meretur.

NOTANDVM etiam quod in quolibet quatuor anni temporum, est quoddam ieiunium tri-

um dieram. Ieiunium enim celebramus in Vere,  
ut sicut tunc omnia uirent, ita in nobis uireant  
uirtutum opera, uel ut in nobis temperetur ille hu-  
mor, qui assimilatur ueri, sanguis scilicet, qui est  
calidus, humidus. Ieiunamus in æstate, ut simus  
feruentes in charitate, uel ut in nobis temperetur  
humor ille qui assimilatur æstati, scilicet Cholera,  
quæ est calida & sicca. Ieiunamus etiam in Au-  
tumno, ut in nobis proueniat fructus bonorum o-  
perum, uel ut in nobis temperetur humor ille, qui  
assimilatur autumnio: Melancholia scilicet, quæ  
est frigida & sicca. Ieiunamus etiam in Hyeme,  
ut sicut tunc defluunt folia ab arboribus, & mo-  
riuntur herbæ prauæ, ita in nobis moriantur uitia  
& superfluitates à nobis defluant, uel ut in nobis  
temperetur humor ille, qui assimilatur hyemi, sci-  
licet phlegma, quod est frigidum & humidum.  
Quibus igitur diebus & quando hæc ieiunia ce-  
lebrari debeant, per hos scitur uersus,  
Vult crux, Lucia, Cineres, Charismata dia,  
Vt sit in angaria quarta sequens feria.

Quoniam etiam quorundam Apostolorum  
uigiliæ, ex primitiue Ecclesiæ institutione ieiunium  
obseruant, ad illarum retinentiam uersus isti assi-  
gnantur.

Petrus & Andreas, Paulus cum Simone Iudas,  
Vt ieiunemus nos admonet, atque Mathæus.  
Sabbata ieiunes si Solus lux tenet ipsos.

In uigilijs etiam omnium aliorum, nisi solennis  
patriæ consuetudo obuiauerit, Dominus Papa ieiu-  
nare confirmauit, præterquam in uigilia Ioannis  
Euangelistæ, die secunda natiuitatis Domini, & ui-  
gilia Philippi & Iacobi pridie Calendas Maij, cū  
tunc sit tempus iucunditatis & letitiæ.

Sunt etiam præter prædicta, sex festa alia in anno  
canonizata, in quorum uigilijs Ecclesia ieiunium  
celebrat, quæ in his patent uersibus.

Nat. Domini, Pentecq; Ioan. Lau. supplico sancto.  
Horum uigilia ieiunes, Lucæque Marci.

Quoniam Aduentus Domini penes literæ domi-  
nicalis diuersitatem in anno solari uariatur, ad ha-  
bendum certum diem Aduentus Domini sciantur  
isti uersus.

Andræ festo uicinior ordine quouis

Aduentum Domini feria prima notat.

Si cadit in lucem Domini celebratur ibidem.

Hæc itaq; de pertinetibus ad cursum Solis scire  
sufficiat computistis.

ALTERA PARS COMPTI, DE  
DISTINCTIONE TEMPORIS  
ratione motus Lunæ.

De illuminationibus Lunæ.

Um ex motu Lunæ, quemadmodum  
& Solis, plures Ecclesia consequatur utilitates, de eius motibus, & luminis receptione, & utilitatibus, ex his consequentibus, quanto sensibilius poterit, existimo esse, expediendum. Vt igitur innuit Martianus, quamuis Luna sapientum assertionem, menstruum lumen habere ostendatur. Quod tamen pleni orbis sit semper in lumine, non est dubium. Nam in parte illa, qua se Soli obijcit, omni hemisphærio collustratur. Vnde cum nobis tricesima nullum lumen ostendet, superius qua Solem aspiciat, pleno lumine luceat, & cum à Sole discedens, eum à latere cœperit intueri, pro parte inferius lumen acquirit, donec deinceps è contrario posita, in tota parte quâ terris opponit illuminetur. Circuit enim eius globum undiq; nitor Solis, & medietati quam aspiciat, semper lumen indulget. ..

Huius ergo primi luminis effigies, cornibus circulata *μηνὸς ὄψις* dicitur, scilicet cum duobus pun-

Etis, siue. 6. gradibus à sole distans, nobis apparere  
inceperit. Cum autem à Sole distantis. 90. parti-  
bus, orbem eius radius solaris illuminauerit, quasi  
septima, διχότομος perhibetur. Alijs etiam. 45.  
partibus iterum adiectis, uelut undecima, ἀμφί-  
κνυτος nominatur. Cum uero. 180. partibus à So-  
le discesserit, è contrario posita in parte inferiori,  
nobis opposita, uniuersaliter illuminatur, tan-  
quam quintadecima πανσέληνος dicitur. Po-  
stea quidem deficiens, cum prædictis partibus no-  
mina eodem modo recipit commemorata, prout  
patet in figura.

Coniunctio dicitur etiam νεομηνία, σύνοδος,  
Nouilunium, Interlunium, Primatio.

Prima Luna, κηνοσθής, Corniculans, falcata,  
nondum semiplena.


Septima, διχότομος, ἡμίτομος, semiplena,  
dimidiata.

Undecima, ἀμφίκνυτος. Gibbosa, Turgida.

Decimaquinta, πανσέληνος, Plenilunium,  
Oppositio.



FIGVRA DE ILLVMINAa  
tione Lune.



## DE MENSIBVS LVNARIBVS.

Ensum autem Lunarium quatuor sunt  
**M** species. Est enim mensis peragracionis,  
 mensis apparitionis, mensis medicinalis,  
 & mensis consecutionis.

Primus itaque mensis, peragracionis scilicet, est  
 spacium temporis, quo Luna circuit zodiacū, ex-  
 iens ab uno puncto, proprio motu, rediens iterū  
 in idem, unde ex huiusmodi in circulo signorum re-  
 uolutione, annus à pluribus nuncupatur, cuius qui-  
 dem punctalis perfectio, secundum sensum scire sa-  
 tagentibus, ex motu ipsius Lunæ diuino, commensu-  
 rari potest. Est autē motus Lunæ diurnus. 13. gra-  
duz. 10. minuta. 34. secunda. 58. tertia. 33. quarta  
30. quinta, & 30. in sextis. Gradus quidem est.  
 360. pars circuli. 60. uero pars gradus minutū.  
 minuti. 60. secundum, & ita deinceps. Si itaq; mo-  
 tus iste tum in se, tum in suis partibus, à toto zodia-  
 co, in sexta redactō, quotiens poterit subtrahatur,  
 exhibit mensis peragracionis, scilicet. 27. dierum,  
& 7. horarum, & 43. minutorum. 7. secundorū.  
15. tertiorum. 36. quartorum, & 55. quintorum.  
 Erit ergo mora Lunæ sub quolibet signo duorum  
dierum, 6. horarum, 39. minutorum, frequens ta-  
 men uniuersorum usus, cum minimum desit. 42.

*Luna motus in  
 die naturalis.*

*Mensis Pe-  
 ragracionis  
 Lune*

id est, beſſem, horæ completè ſupponit, Vnde men-  
ſis peragratiōis ex. 27. diebus, & 8. horis, hac  
conſtabit ſuppoſitione. Vnde uerſus,

Percurrit Cyclum uiginti Luna diebus.

Septenisq; ſuum, bis quattuor in ſuper horis.

Luna quidem cum præſit noctibus, dies compu-  
tationis eius à Solis occaſu incipere debet, nobis  
econtrario diem Solis diſcernentibus.

Secundus uero menſis dicitur, Apparitionis,  
conſtans ex. 28. diebus, per. 4. hebdomada uulga-  
riter diſtributis. Quarum prima eſt à principio ap-  
paritiōis Lunæ, uſque in diem ſeptimum, & ita  
deinceps. Vnde quarta hebdomada in. 28. die ter-  
minatur. Horæ enim combuſtæ, ſcilicet, dum Luna  
ſub radijs ſolaribus moratur, non cōputantur. Cu-  
ius immutatiōis diuerſitatem quo ad nos, corpo-  
rum fluidorum, ſicut medullarum, & cerebellorū  
natura, & præcipuè motus maris imitatur. Vnde  
uerſus,

Hebdomada prima collabitur æquoris unda.

Æſtuat unda maris tanquam ſeruore ſecunda,

Tertia cogit aquas minui, uelut igne reducto,

Vltima ſandit eas ex ære littore toto.

Et Lucanus;

Luna ſuis uicibus, Thetyn terrenaq; miſcet.

Cum enim luna meridianū teneat in Auſtro, ſi-

*Mēſis Appari-  
tiōis*

ue punctum oppositum, in angusto terræ mare plenum est. Cū uero in oriente uel in occidente teneat horizontem, completè retractum est.

*Mēsis Medicinalis*

Secundum Medicos quidem mēsis iste supponitur. 26. dierum, & dimidij, Galeno perhibente. Vnde mēsis medicinalis, in utriusque istorum mēsum medio equaliter consistens efficitur, scilicet: 27. dierum, duabus horis exceptis, & in 4. partitur septimanas, diuidendo eum per minutas.

*Mēsis Consecutionis*

Quartus quidem mēsis Consecutionis dicitur, & est spatium temporis, quo Luna accensa à Sole peragrat circulum suum, rediens ad punctum, ubi accensa fuit, sed cum ibi solem non inueniat, quoniam Sol interim serè pertransiuit unum signum, ipsa attingit solem spatio. 2. dierum, & 4. horarum, 44. minutorum, trium secundorum, & 16. tertiorum, & erit iterum in coniunctione cum Sole. Deinde denuo procedens, rursus nasci ac renouari dicitur. Vnde mēsis iste continet. 29. dies, & dimidium cum minutorum fractionibus, sicut patet per Alfraganum, in 1. Differentia, & Ptolemaeum in dictione quarta Almagesti, & ex motibus Solis & Lunæ diurnis: Si enim supponatur Sol & Luna in eodem puncto, & sumantur motus utriusque in tempore cōmemorato, inuenietur Sol pertrāsisse circiter signum unum. Et Luna to-

tum Zodiacum, & circiter signum unum. Erunt  
igitur iterum in coniunctione. Vnde iste appellatur  
Mensis consecutionis. Cuius quatuor à Philoso-  
phis distinguuntur etates, quarum primam, calida-  
dam & humidam, secundam, calidam & siccam,  
terciam, frigidam & siccam, quartam, frigidam  
& humidam esse asserunt. Sic igitur patet, quod  
quaelibet Lunatio naturaliter est. 29. dierum, &  
dimidij, cum prædictis minutorum fractionibus.  
Sed cum Ecclesia nec menses nec annos, secun-  
dum numerum dierum incompletum computet,  
semper omittis minutijs ad Embolismorum restau-  
rationem, transfert dimidium diem unius Lu-  
nationis, ad dimidium diem alterius Lunatio-  
nis, computans unam lunationem. 30. dierum,  
aliam. 29. dierum. Hoc tamen impeditur quan-  
doque per bisextum, quandoque per Embolismum,  
& per Saltum Lune, & cum una Lunatio  
secundum Ecclesiæ computationem sit. 30. dierum  
alia. 29. lunatio parium dierum attribuitur mensi  
impari, & è conuerso, Vnde uersus, *par luna impari,  
impar luna pari, par fiet in impari mense.*

Si autem queratur quare sic sciendum quod  
secundum primam mensium à Iulio institutionem,  
mensis in impari loco positus, semper fuit pluri-  
um dierum, & ratio exigit, ut mensi in numero

dierum maiori maior attribuat<sup>r</sup> lunatio. Vnde  
sic adhuc adoleuit usus. Item lunatio dicitur sem-  
per illius mensis in quo terminatur. Vnde uersus,  
In quo completur mensi lunatio detur.

Si autem duæ l<sup>u</sup>nationes terminentur in uno mē  
se, altera illarum erit irregularis, scilicet embolif=  
malis, id est, hoc fiet mediante embolismo. Qualiter  
autem bisextus impedi<sup>t</sup> lunationis alterationem,  
sic patet. Regula enim est, quod semper in anno  
bisextili lunatio Februarij est. 30. dierum, in alijs  
uero annis. 29. dierum, & hoc propter diem unū  
ex crescentem per bisextum. Vnde in anno bisextili  
lunationes tres, erunt continuo triginta dierum, sci  
licet Ianuarij, Februarij, & Martij.

Notandum etiam, quòd quoties lunatio Mar=  
tij incipit ante locum bisexti, & sit annus bisexti  
lis, uidetur duplex inconueniens contingere, scilicet  
quod Lunatio Martij sit. 31. dierum, quod est inau  
ditum, & Lunatio Februarij. 29. dierum tantum,  
quod est contra regulam iam dictam. Ad hoc autē  
soluēdum nota, quod ubi Lunatio, scilicet Martij,  
debet pronuciari prima, in tali loco Lunatio Fe=  
bruarij pronuciabitur. 30. & ita numerus, desi=  
gnans primationem Lunationis Martij, intelli=  
gatur poni in sequenti loco.

Hoc etiam notatur in quibusdam Calendarijs,

per quendam numerum extrâ scriptum, à tertio Nonarum Februarij, usque ad locum bisexti, ita quod.19. ponantur extrâ, contra pridie Nonas.8. uero contra Nonas, & sic descendendo usque ad locum bisexti. Istud idem similiter notatur quibusdam lineis obliquè protractis ab ijsdem locis usque ad bisextum.

DE AETATE LUNAE INVENIENDA & Cyclo Decennouennali.

Ad habendam autem aetatem Lunæ singulis annis, hoc est tempus accensionis eius à Sole, primò inueniebantur tabulae à Romanis. Deinde Chaldaei aureum numerum inuenerunt, & Romam miserunt. Romani igitur numerum illum, propter eius facilitatem & utilitatem, in Calendarijs suis aureis literis scripserunt, unde adhuc aureus appellatur numerus. In primo igitur anno Cycli decennouennalis, per totum annum primationes Lunæ, per unitatem notantur, in secundo per.2. & ita deinceps. Transiens igitur à Decembri in Ianuarium, transibit ab unitate in.2. ponendo binarium super E litteram, pridie idus Ianuarij. Similiter uariabitur ordo in cæteris annis, unde cum Cyclus iste conti-

*Aureus numerus.*



neat. 19. annos, inter numeros predictos. 19. maximus erit.

Ponitur ergo in prima die Ianuarij. 3. quoniam ita contingit in tertio anno istius Cycli, quod in primo die Ianuarij semper Luna fuerit prima, licet aliter modo contingat. Ab isto itaque numero formantur alij numeri sequentes, per additionem. 8. ita tamen quod si ex crescat maior numerus quam 19. reiectis, 19. residuum sumatur. hoc ideo fit, quoniam primationem cuiuslibet anni, sequitur immediate primatio anni octauj post, & si aliquid deletur in loco proximo scribatur, si uero nihil, unus punctus uacuuus relinquatur.

In aureo autem numero ferè per totum Calendarium minor sequitur maiorem numerum immediate, uel maior minorem mediatè. Istud tamen habet instantiam in. 12. locis in Calendario, ita quod in. 6. locis iuxta principia. 6. mensium, pari numero signatorum, ut secundo, quarto &c. reliquæ. 6. instantiæ sunt iuxta fines sex mensium continuè sumptorum, habito initio à Iulio, quod totum in his continetur uersibus.

Aureus hac arte numerus formatur aperte,  
Prima dies Iani, quæ ianua dicitur anni,  
Ternarium retinet, ne posterus ordo uacillet,  
Per præcedentem numerum dant octo sequentem.

Si decimum nonum superabis sic numerando,  
Tolle decem, pariterque nouem, reliquum reti-  
nendo.

Maiori numero debetur tertius ordo,  
Si minor assequitur, maiori continuatur.  
Per bisseña loca non est hæc regula firma,  
Tres Februi quarto nonarum continuato,  
Quattuor apponas sub Aprilis pridie nonas,  
Tot Iunius laterat, ubi nonis quattuor aptat,  
Augusti capite tres debes continuare,  
Quattuor Octobris lateratim pone Calendis,  
In quartis nonis Duodeni deniq; mensis.  
Linea tredecimum tenet una, simulq; secundum,  
Excipe sex menses, Iulium prius atq; sequentes  
His quauis crescat undenis summa propinquat,  
Octo minor numerus sequitur, nec continuatur.  
Tali quippe modo describitur Aureus ordo.

Est autem Cyclus decennouennalis. 19. anno-  
rum solarium reuolutio, in qua omnis Lunæ pri-  
mationis diuersitas, ad pristinam reuertitur posi-  
tionem. Secundum quem procedimus, primationes  
Lunationum assignando, & cui deseruit Aureus  
numerus. Romani autem, quendam alium inuene-  
runt Cyclum, qui lunaris dicebatur, penes quem  
lunæ accensionis diem, & horam assignauerunt,  
huic scilicet consimilem, in ordine tamen inceptio-

nis differentem. Incipit enim in Calendis Ianuarij, tertio uidelicet anno Cycli decennouennalis, uel secundum alios quarto, qui in nomine tantum illis discrepant. Illum enim quartum, quem alij tertium uocant, considerantes, annum Cycli decennouennalis, secundum lunationem paschalem incipere. Vt cum primus & secundus sint communes, tertius uero Embolismalis, de necessitate oportet primum dicere, quando primatio paschalis per. 19. notatur pridie nonas Aprilis. ab ista enim primatione usq; ad illam, quæ per unitatem currit, est annus communis, & ita deinceps. Posita igitur unitate in Calendis Ianuarij, deinde facta formatione ad modum aurei numeri, per additionem. 8. formari habet uterque Cyclus. Itaque à Ianuario incipit. Nos autem magis Chaldaeos & Eusebium Episcopum imitamur, qui à Lunatione Paschali, ut dictum est, incipit. Si autem scire uolueris in quoto anno Cycli decennouennalis simus, annis Domini ab eius Natiuitate inceptis adde unitatem, & totum diuide per. 19. & si nihil fuerit residuum, sumus in ultimo. Si uero aliquid residuum quicquid fuerit, ostendit nobis in quoto anno Cycli sumus. Sed si in quoto anno Cycli lunaris simus scire uolueris, ab annis Domini subtrahere. 2. uel adde. 17. & diuide ut prius.

Ne uulgarem incurramus dubitationem, causam ignorantes, cum realiter luna fuerit quarta secundum Ecclesiam, quare prima pronuncietur. Sciendum quod Ecclesia supponit spatium. 19. annorum Solarium, & Cyclum decennouennalem penitus coequari, scilicet in. 19. annis solaribus, secundum Ptolemæum in tertia dictione Almagesti, sunt. 6939. dies, & .18. horæ, licet nimis prodigè fiat computatio.

In Cyclo uero decennouennali, sicut ab eodem in quarta dictione eiusdem habemus, sunt totidem dies, & .16. horæ, & ferè. 2. tertiæ horæ unius. Vnde in quolibet Cyclo, secundum istam suppositionem, recedit media coniunctio siue primatio à nostra computatione, per unam horam, & tertiā horæ unius. Sed Gamaliel secundum Iudeos qui Pauli Apostoli erat magister, secundum uero nos Eusebius Cæsariensis Episcopus, & Hieronymus in initio Cycli illius, in quo dominus incarnatus fuit considerauerunt Lunam fuisse primam. 10. Calendas Aprilis, & quod ad idem redit. 10. Calendas Februarij, unde ibi unitas pro aureo numero ponitur. Sed ab incarnatione Domini elapsi sunt. 1232. anni, à quo numero si Cyclus decennouennalis quoties poterit, subtrahatur, patebit quod in. 65. horis, & totidem tertijs, à ueritate nunc extenditur

nostra computatio, quibus in dies redactis, habemus. 3. dies & 14. horas. Vnde per tres dies & dimidium, recessit media coniunctio à loco primæ impositionis. Nunc igitur Luna dicitur prima, ubi deberet dici tertia, uel potius quarta, ut aureus numerus totaliter per. 3. dies anticipetur: & unitas, quæ notatur super B. 10. Calendas Februarij, scribatur super F. 13. Calendas eiusdem, & sic de alijs omnibus, eodem ordine qui nunc est, obseruato. Sed quia in Concilio generali aliquid de Calēdario trāsmutare prohibitum est, oportet, modernos adhuc sustinere huiusmodi errores.

## DE ANNIS LUNARIBVS,

& primo de Anno communi.

Annorum autem Lunarum, duo sunt genera, Alius enim est communis, & alius Embolismalis.

Communis autem est spatium. 12. lunationum, in anno solari uicissim transeuntium. Et dicitur communis, quoniam. 12. habet lunationes, siue menses Lunares. Sicut annus Solaris. 12. habet menses Solares, uel quia duo anni communes fere semper simul eueniunt, sicut patebit in assignatione Embolismorum. Habet autem iste annus. 354. dies, &

quintam & sextam unius diei, ut à Ptolemæo &  
 Alfragano perhibetur. Quod etiam ostendi pote-  
 rit, cum habeat. 6. lunctiones. 30. dierum, & alias  
 sex. 29. dierum, cum minutorum computatione.  
 Vnde patet, quòd annus Solaris excedit hunc an-  
 num communem in undecim diebus omiſſis minu-  
 tijs. Si igitur illi duo anni simul incipiant, prius ter-  
 minabitur annus iste communis, per undecim dies,  
 quàm annus Solaris, sicut patet, quando sumus in  
 tertio anni Cycli decennouennalis. Quare si Lu-  
 na fuerit prima in Calendis Ianuarij, eodem die  
 anno reuoluto, erit duodecima, propter excremen-  
 tum illorum undecim dierum. Consimilis erit ua-  
 riatione in Calendis cuiuslibet mensis, & in singulis  
 diebus anni. Vnde propter hoc rectificandum, inue-  
 nerunt computistæ duos numeros, scilicet Epacta  
 & Regularem lunarem, per quorum coniunctio-  
 nem adinuicem, patebit ætas lunæ in Calendis men-  
 sium. Ad habendum autem cuius ætatis sit luna, in  
 singulis diebus anni, ex isto excessu undecim dierum  
 de ætate lunæ, respectu temporis præteriti, & fu-  
 turi, duæ dantur regulæ.

Si ergo supponatur hodie alicuius certæ ætatis,  
 & uelis scire in anno futuro, hoc eodem die, quo-  
 tæ ætatis erit, ætati lunæ, quam modo habet, addere.  
 II. & tantæ ætatis erit luna in anno futuro, eodem

die. Illi iterum ætati Lunæ, adde. 11. & habebis  
eius ætatem in anno tertio eodem die, & sic in infi-  
nitum. Hoc tamen prænotato, quod si excresceret  
maior numerus quàm. 30. reiectis. 30. residuum  
pro ætate lunæ ponatur.

Si autem scire uelis, cuius ætatis fuerit Luna,  
hoc eodem die, in anno præterito, tertio uel quar-  
to, ætati lunæ, quam modo habet, adde. 19. & ha-  
bebis ætatem eius in anno præterito, & sic dein-  
ceps. Hoc etiam ut prius notato, quod si excrescat  
maior numerus quàm. 30. reiectis. 30. residuum  
pro ætate lunæ ponatur. Vnde uersus,

Quinq; dies & sex, ponas pro luce futura.

Et pro præterita, quinq; bis atq; nouem.

Licet in uno die quandoq; fallat, quod uniuer-  
salius est, pro regula instituat.

### De Anno Embolismali.

*ἔμβολισμός* intercalatio. *ἑμβόλιμος* intercalaris,  
inuenietur, ab *ἑμβάλλω*, iniicio, inserto.

Nuus autem Embolismalis est spatium.

A 13. lunationum, constans ex. 384. die-  
bus. Vnde excedit lunarem communem  
in. 30. diebus, annum uero solare in. 19. diebus.  
Et dicitur Embolismalis ab Embolismo, sicut bisex



tilis à bisexto. Quare uidendum est quid sit Embolismus, & unde oriatur, & ubi in Calendario inserponatur.

Est autem Embolismus lunatio. 30. dierum nulli mēsi attributa. non enim alicuius mēsis lunatio principalis dici meretur. Cū ex reliquijs aliarum mendicando perficiatur. Dicitur autem Embolismus ab ἐμβολος, quod est, excrementum. Sunt enim in Cyclo decennouennali. 235. Lunationes, sed tantum. 228. menses Solares. Vnde si singulis mensibus singulæ attribuantur Lunationes, supererunt septem irregulares, quæ Embolismi dicuntur, ad quorum completionem, ut quilibet secundū sui proprietatem sit. 30. dierum, lunationum totius Cycli necessaria est aggregatio fractionum. In Cyclo igitur decennouennali, lunationes sunt. 235. quod sic patet. In. 12. annis communibus sunt. 144. lunationes, in. 7. Embolismalibus sunt. 91. lunationes, quæ superioribus additæ, faciunt 235. lunationes, de quarum qualibet ad præsens omittantur. 44. minuta. 3. secunda, & 16. tertia, & de numero illarum lunationum excipiantur septem, ad opus. 7. Embolismorum, & reseruentur illæ. De residuis autem scilicet. 228. fac semper unam. 30. dierum, & aliam. 29. dierum, nisi quod in anno bisextili lunatio Februarij semper erit. 30.

dierum, quantoq; parcius fiat computatio in Cy-  
clo, sunt quatuor bisexti. Ad completionem igitur  
quatuor lunationum Februarij, in quatuor annis  
bisextilibus Cycli, oportet mendicare. 4. dies in-  
tegras. Similiter & ad. 7. Embolismos perficien-  
dos, exiguntur septem dimidij dies. Resume igitur  
singularum lunationum totius Cycli decennouen-  
nalis fractiones, & multiplicentur per summam lu-  
nationum, & habebis. 7. dies & .5. horas. Dentur  
igitur quatuor dies ex his integri. 4. lunationibus  
Februarij, in. 4. annis bisextilibus, & de tribus resi-  
duis, perfice sex Embolismos, ut sit quilibet. 30.  
dierum. Vnde non relinquitur, quod detur septimo  
Embolismo, ad sui completionem, nisi quinq; ho-  
ræ. Sed cum ad similitudinem aliorum debeat esse.  
30. dierum, à lunatione Iulij in ultimo anno Cycli  
decennouennalis, quantum ei sufficit mutuetur, scili-  
cet. 7. horas, computatur tamen lunatio Iulij. 29.  
dierum. Vnde iste dies quoad maiorem sui partem,  
sic subtractus à lunatione Iulij, dicitur Salus Lune,  
de quo patebit inferius.

Quotus autem annus Cycli decennouennalis,  
secundum Lune primationis anticipationem, apud  
Chaldaeos & Eusebium, sit Embolismalis, patet  
per hunc uersum, Christus factus homo lenat omnia reddita throno

In hoc uersu sunt septem dictiones, septem Embolismis deseruiētes. Prima primo, & sic deinceps. Vide igitur quota sit litera primæ dictionis in Alphabeto, & in tali anno Cycli decennouennalis interponitur Embolismus, cui deseruit illa dictio. Idem etiam facilius scitur per hos uersus, Tertius & sextus, octauus & undecimalis. Et quartus decimus, deca septimus, & decanonus.

Ad sciendum etiam quoto mense, & quoto die eiusdem mensis interponi debeat Embolismus, sciat<sup>ur</sup> iste uersus,

Mobilis ibo cifris ace liber habe coæuum.

Men	12	9	3	6	11	8	3
sis	M	I	C	A	L	H	C
Di=	2	2	6	3	2	2	5
es.	B	B	F	C	B	B	E

In hoc uersu sunt septem dictiones. 7. Embolismis seruiētes, prima; primo, & sic deinceps. Vide itaq; quota sit litera prima alicuius dictionis in Alphabeto, & in tali mēse interponitur Embolismus, cuius dictionem sumpsisti. uide etiam quota sit in Alphabeto litera prima, secundæ syllabæ eiusdem dictionis in Alphabeto. Et in tali die eiusdem mensis, est sedes Embolismi.

Notandum autem quod multiplex error contingit in Calendario per Embolismum, quoniam error uicissitudinis, error terminationis, error uaria-

tionis, & error Epactarum. Error uicissitudinis est, quoniam simul sunt plures lunationes. 30. dierum. Error terminationis est, quando lunationes terminantur extra suos menses. Error uariationis est, quando mensis positus impari loco imparem habet lunationem, uel econuerso. Error Epactarum eo fit, cum mentiuntur Epacta & regularis.

Primus igitur Embolismus incipit secundo die Decembris, & terminatur ultimo die eiusdem & contingit error uicissitudinis. Lunatio enim Embolismalis, & lunatio Ianuarij, simul sunt. 30. dierum. Et si bisextus fuerit. 4. lunationes erunt simul. 30. dierum, scilicet lunatio Embolismalis, Ianuarij, Februarij, & Martij. Embolismus iste assignatur in tertio anno Cycli decennouennalis, quemadmodum secundum inceptionem lunationis Aprilis predictum est.

Secundus Embolismus incipit secundo die Septembris, & terminatur die prima Octobris, & contingit error uicissitudinis, quoniam lunatio Septembris, & Embolismalis, simul sunt. 30. dierum, & assignatur in sexto anno Cycli decennouennalis, eadem die, qua prius, ratione repetita.

Tertius Embolismus incipit sexto die Martij, & terminatur quarto die Aprilis, & contingit error uicissitudinis, quia lunatio Martij & Embolismalis

smalis, simul sunt. 30. dierum. Et si bisextus fuerit.  
4. scilicet Ianuarij, Februarij, Martij, & Embolismalis, simul erunt triginta dierum.

Contingit etiam error terminationis, quando lunatio Aprilis terminatur. 3. die Maij. Lunatio Maij, secunda die Iunij. Lunatio Iunij, prima die Iulij. Eo etiam anno mentiuntur Epacta, & regularis in principio scilicet Maij & Iunij, ut inferius patebit.

Quartus Embolismus incipit tertio die Ianuarij, & terminatur prima die Februarij, & contingit error uicissitudinis. Lunatio enim Ianuarij & Embolismalis simul sunt. 30. dierum, & si bisextus fuerit. 4. scilicet lunatio Ianuarij, Embolismalis, Februarij & Martij. Contingit etiam error terminationis: quia lunatio Februarij terminatur secunda die Martij. Lunatio Martij, prima die Aprilis. Præterea tunc mentiuntur Epacta & regularis in principio Martij, nisi sit bisextus.

Quintus Embolismus incipit secundo die Nouembris, & terminatur prima die Decembris, & cōtingit error uicissitudinis: quia lunatio Nouembris & Embolismalis simul sunt. 30. dierum. Et notandum quod Embolismus iste est causa, quare in secundo die Decembris in una linea ponantur duo numeri, scilicet. 13. & 2. Si enim. 13. poneretur in

primo die, duplex contingeret inconueniēs, scilicet, quod Embolismus præcedens tantum esset. 29. die rum, & lunatio Decembris. 30. dierum, cuius contrarium semper contingit. Embolismus autem iste intercipitur in decimo quarto Cycli decennouennalis anno, ratione prædicta.

Sextus Embolismus incipit secunda die Augusti & terminatur ultima die eiusdem, & contingit error uiciſſitudinis, quoniam lunatio Embolismalis & Septembris, simul sunt. 30. dierum. Est autē Embolismus iste in. 17. anno Cycli decennouennalis, prout patet in præcedentibus.

Septimus Embolismus incipit. 5. die Martij, & terminatur tertia die, scilicet Aprilis, & contingit error uiciſſitudinis. Lunatio enim Martij & Embolismi sunt simul. 30. dierū. & si bisextus fuerit. 4. lunationes simul euenient. 30. dierum, scilicet Ianuarij, Februarij, Martij, & Embolismi. Contingit etiam error terminationis, quoniam lunatio Aprilis terminatur. 2. die Maij, & lunatio Maij prima die Iunij. Mentiuntur etiam Epacta & regularis in principio Maij, & Augusti. Iste Embolismus intercipitur in. 19. anno Cycli decennouennalis, prout patet in præcedentibus. Intercalentur itaq; in locis prædictis Calendarij septem Embolismi, ut alijs, quantominus poterit derogetur lunationibus. Si

enim alibi ponerentur plures, mentirentur Epactæ  
& regularis, & plures contingerent errores. Sed  
de malis duobus minus malum est eligendum, dum  
alterum urget, Vnde uersus,  
Si tibi concurrant duo turpia, dilige neutrum;  
Sed quod turpe minus elige, Beda docet.

DE AETATE LVNAE ALI-  
ter inuenienda.

D habendum autem artificialiter, & si  
A ne inspectione Calendarij, quotæ ætatis  
sit Luna in Calendis mensium, & per eõ  
sequens, in quolibet die anni, inuenti sunt duo nu-  
meri, Epacta scilicet & regularis lunaris.

EST IGITUR EPACTA numerus. 30  
non excedens, proueniens ex superabundantia an-  
ni Solaris, ad annum lunarem communem. Triginta  
non excedens dicitur, quia cum officium Epactæ  
sit ostendere ætatem lunæ, nulla autem ætas lunæ  
est maior quàm. 30. dierũ, nec Epacta maior de-  
bet esse. Proueniens ex superabundantia & c. di-  
citur, quoniam Epacta prouenit excremento die-  
rum, in quibus annus Solaris excedit annum Luna-  
rem communem.

Primus igitur annus Cycli decēnouennalis Epa

*Epacta qd*



Etiam non habet, cum non præcedat annus, ex cuius  
inequalitate Epactam haberet, uel hac ratione, cū  
ultimus annus Cycli sit quasi proximus ante pri-  
mum, & ille habeat. 18. pro Epacta, & in eodem  
anno excrescant. 11. dies ex annorum inequalitate  
adinuicem, & unus ex Saltu, erūt in uniuerso. 30.  
Sed triginta sunt quasi nulla Epacta, quia. 30. ad-  
iuncta cum regulari debent deleri, ad ostendendum  
etatem lunæ. Secundus autem. 11. habet pro Epac-  
ta. Tertius. 22. Quartus. 3. Quia abijciuntur. 30.  
& ita formetur Epacta deinceps, per additionem.  
11. Idem scitur per hos uersus,

Quæ tenet undenas Aprilis luna Calendas,  
Epactæ numerum monstrat per quemlibet annum.

Vide quota sit luna undecimo Calendas Aprilis,  
& talis numerus erit Epacta illius anni. Sed si ex  
abrupto alicuius anni quæratnr Epacta, per hunc  
inuenietur uersum,

Deme unū, post adde nouem, post undeuiginti.  
Ponatur enim primus annus Cycli decennouenna-  
lis, in radice pollicis, secundus in media iunctura.  
Tertius in summitate. Quartus iterum in radice, &  
ita circulariter cōputes annos Cycli, donec occur-  
rat annus de quo quæritur Epacta. Et si sistat in ra-  
dice, subtrahatur unitas. Si in media iunctura, adde  
9. Si in summitate adde. 19. & habebitur Epacta

anni quæfiti. Dicitur autem Epacta ab ε'π'ι', quod est supra, & aucta propter illud excrementum. II. dierum superius dictum. Vel ab ε'ω'ι', quod est supra, & adiecta, ipsa enim super adiecta regulari in Calendis mensium, etatē lunæ ostendit. (Epactæ ab ε'ω'ι'γδλς, quod est intercalare seu addere.)

REGULARIS Lunarīs est numerus. 30. non excedens qui adiunctus cum Epacta, etatem Lunæ in Calendis mensium manifestat, triginta nō excedens, expone ut prius de Epacta. Sed istud membrum, qui adiunctus & c. ostendit tam officium epactæ, quā regularis.

Origō autem regularium est, ex. 5. diebus remanentibus ultra dies anni, singulis mensibus per. 30. distributos. Vnde September. 5. habet pro regulari. Vel quoniam quilibet mensis tot habet pro regulari, quota Luna fuit in Calendis eius in principio compositionis Calendarij, & semper habebit. Vnde ad hoc sciendum, supponatur quod simus in primo anno Cycli decennouennalis, & patet propositum in Februario, & in. 6. mensibus ipsum sequentibus. In primo enim anno Cycli decennouennalis est aureus numerus unitas, decimo die ante Calendas Februarij, & sic luna est decima in Calēdis eius. Vnde, 10. habet pro regulari. Similiter considera unitatem aureum numerum ante Calen-

das aliorum sex mensium sequentium, & patebit regularis. Sed de Septembri, & 4. mensibus illum sequentibus, supponatur. 19. annus Cycli decennouennalis, quia ille fuit quasi proximus antepriuum, & secundum hoc September habet, 5. pro regulari.

Si uelis igitur alios regulares formare artificialiter, uno supposito, sume numerum dierum Septembris & adde eius regularem, & à totali numero subtrahatur lunatio eiusdem mensis, & residuum erit regularis mensis sequentis, & ita deinceps. Vnde uersus,

Quinquè Sep. Oc. dantur No. De. Septem ter tria  
1a. Mar.

Feb. A. decem sumant, post unum cuilibet addas.

Habitis igitur Epacta & regulari, si scire uelis ætatem lunæ in Calendis alicuius mensis, iungantur simul Epacta anni, & regularis lunaris mensis illius, & si ex illa coniunctione resultent. 30. uel minor numerus, talis ætatis erit Luna in Calendis mensis illius, cuius regularem sumpsisti. Si maior, reijce. 30. & residuum ostendet ætatem Lunæ. Vnde uersus,

Dant Lunam mensis Epacta cum regulari,  
Plus retinens, cum plus fuerit, triginta relinques.

Ad ætatem etiam Lunæ in Calendis mensium

habitam, addatur numerus dierum mensis præteri-  
 torum, uno die subtracto, ne bis primus compute-  
 tur, & in die præsentis ætas Lunæ habebitur. Sed si  
 summam lunationis mensis excesserit, residuo retē-  
 to, ipsa abijciatur. Si autem qua hora Luna à Sole  
 accendatur scire uolueris, annum quotus fuerit Cy-  
 cli lunaris, per. 4. multiplica, & his dies anni  
 præteritos, à Calendis Ianuarij, usque in diem de  
 quo quæritur, aggrega, quibus in unum redactis,  
 per quinque diuide, & scies ea hora Lunam accen-  
 di, cui. 5. defuerit, & in toto ipsius horæ puncto,  
 quot cuius cæterarum superfuerint horarum. Si  
 uero numeri aggregatio. 60. excesserit, reiectis.  
 60. de residuo fac ut prius, quod si nihil superfue-  
 rit, in ultimo puncto horæ. 12. Luna accenditur. Si  
 igitur istorum asserit sentētia, Lunam semper quo  
 ad nos in nostro accendi hemisphærio, quod etiam  
 auctoritate Ptolemæi in Atarbe primo dicentis con-  
 firmatur. Luna quidem occidentem de iure uendi-  
 cat, cum à Solis conuentu discedens, ibidem semper  
 nouam lucem representet, & primus eius incipiat  
 ascensus. Luna autem singulis diebus incremento. B  
 4. punctis remouetur à Sole, in decremento Soli  
 admouetur. Vnde si scire uolueris, in quo signo sit  
 Luna, & quantum à Sole distans, ætatem eius per  
 4. multiplica, & per. 10. partire, & quot fuerint  
f ij

denarij, per tot signa distat à Sole Luna, & quot remanserint unitates per tot puncta in signo subsequenti pertransiuit. Signum autem intelligo signi quantitatem. Vt si Luna coierit cum Sole in .5. gradu Arietis, eadem cum fuerit quinta, erit in decimo gradu Geminorum. Luna enim. 13. partes peragente. Sol unam complet. Vt omisis utrobique minutis, sensible pro exemplo ponatur.

Si uerò per quot horas Luna de nocte luceat scire uolueris, cum in cremento fuerit, etatem eius per quatuor multiplicabis, in decremento residuum etatis eius, quanto minus fuerit à triginta, & per quinque partire, quot igitur fuerint quinarij, per tot horas lucebit, & quot unitates, per tot puncta. Vnumquodq; enim signum. 10. habet puncta, hoc est, horas duas, ut quinque puncta horam unam constituent, in lunari computatione, & punctus quilibet. 3. continet signi gradus.

Incipiunt autem Epacta & regularis lunaris à Septembri, & Epacta est numerus uariabilis. Regularis uerò numerus inuariabilis. Si autem uelis scire in quoto anno Cycli Epactarum simus, utendum est eodem artificio, quo utebamur ad sciendum in quoto anno Cycli decennouennalis essemus, addendo annis Domini unitatem &c. Iste enim Cyclus non differt ab illo, nisi quod prius

incipit spatio. 4. mensium, scilicet à Septembri, ille  
necro à Ianuario.

Mentiuntur autem Epacta & regularis luna-  
ris in toto Cyclo decennouennali quinquies, quoniã  
bis in octauo anno. Vnde uersus,  
Fallitur octauo cum Maio Iulius anno.

Dicunt enim Epacta & regularis in octauo  
anno Lunam esse. 28. dierum in Calendis Maij, cū  
tamen reuera sit. 27. dierum. Dicunt etiam in eodē  
anno lunam esse. 30. in Calendis Iulij, cum sit. 29.  
dierum. Et semel iterum in undecimo. Vnde uersus,  
Ni sit bisextus fallit Martem à deca primus.

Dicunt enim Epacta & regularis in undecimo  
anno Cycli Lunam esse. 29. dierum in Calendis  
Martij, cum sit. 28. dierum tantum, cum tamen sit  
28. dierum. Sed si bisextus fuerit. 2. dies computan-  
tur super sexto Calendas Martij. Vnde tunc nō fal-  
lit bis etiam in ultimo. Vnde uersus,  
Vltimus Augustum fallit, fallit quoq; Maium.

Dicunt enim Epacta & regularis in ultimo an-  
no Cycli, quod in Calendis Maij Luna sit. 29. die-  
rum, cum reuera sit. 28. dierum, & dicunt etiam  
in eodem anno Lunam esse. 2. dierum in Calendis  
Augusti, cum in ueritate sit. 3. dierum, quod pro-  
pter Saltum Lune contingit, quoniam Lunatio  
Augusti prius incipit uno die, quàm deberet, si nō

*Saltus Lune*

esset Saltus Lune.

Est autem Saltus Lune subtractio unius diei à lunatione Iulij in ultimo anno Cycli decēnouēnalis, & nisi fieret talis subtractio, post unū Cyclū peractum, luna diceretur prima, quando esset secunda. Similiter post. 15. Cyclos peractos. Luna diceretur prima, quando esset. 15. Ecclesia enim supponit. 19. annos solares ex toto ad æquari totidem lunaribus. Sunt autē in. 19. annis solaribus. 6939. dies, & 18. horæ. Hæc autem quantitas, secundum Ecclesiam, est eadem in totidem lunaribus. Sed Ecclesia menses & annos & Cyclum secundum dies integros computans, non expectat terminationem. 18. horarum in fine Cycli. Imò semper in sequentis diei principio Cyclum inchoantis, computatur luna prima. 10. Calendas Februarij, cum tamen in rei ueritate, deberemus expectare finem. 18. horarum, antequam pronunciaretur luna prima. Vnde hæc ætatis Lune anticipatio, quæ ex re nomen habet, dicitur Saltus Lune.

Sed ne uideamur ex tanto saltu in singulis Cyclis inconueniens incurrere, ut Luna. 25. prima dicatur, attende quam subtiliter in. 4. Cyclis omnia ad concordiam reducuntur. Sunt igitur in quolibet Cyclo secundum ueritatem. 5. bisexti præterquam in illo, cuius quartus annus est bisextilis.



Sed de. 4. cuiuslibet Cycli in capitulo Embolismo-  
rum satisfactum est. Vnde de quinto in tribus Cy-  
clis restat assignatio.

Cyclus igitur cuius quartus annus est bisexti-  
lis differendi causa primus uocetur, & esto, quod  
in principio illius Cycli fuerit luna prima, quo cō-  
pleto in sequentis diei principio, ut dictum est,  
Luna prima computatur, cum tamen deberemus,  
expectare. 18. horarū finem. Vnde quo ad motus  
intensionem Saltum facimus, quasi luna motum  
suum intenderet saltando. Pingimus enim eam  
cum Sole coniungi, & esse primam in Cyclo se-  
quenti, eadem ratione aliarum. 18. horarum Sal-  
tum facimus, & ita habemus. 36. horas, hoc est,  
diem unum & dimidium. dies integer per bisextū  
intercaletur in lunatione Februarij, pro quinto bi-  
sexto secundi Cycli. Dimidius autem dies reserue-  
tur tertio Cyclo, ex cuius Saltu, ratione dicta, re-  
sultant. 18. horæ, unde cum residuo superiori ha-  
bemus unum diem integrum, & sex horas. Dies  
integer intercaletur in lunatione Februarij, pro  
quinto bisexto tertij Cycli, ratione assignata. In  
quarto similiter Cyclo, habemus ex Saltu eius. 18  
horas, quibus aggregatis, ad sex superius relictas,  
erit dies unus integer, qui interponatur Februario  
pro quinto bisexto quarti Cycli ut dictum est, &

nihil remanebit. Vnde in sequentis Cycli principio Luna & est, & dicitur prima. Similiter faciendum est in. 4. Cyclis sequentibus & deinceps. Sic igitur in quatuor Cyclis omnia ad concordiam reducuntur. Vnde istud temporis spatium Cyclus Cyclorum appellatur.

In cuius autem quoto Cyclo sumus, sic scitur. Numerus annorum Cycli decennouennalis, à bissextili proximo quouis ordine, usque in finem eiusdem per. 4. diuidatur, & si remanserit ternarius, sumus in primo Cycli. Si binarius, in secundo, si unitas, sumus in tertio, si autem nihil, sumus in ultimo.

#### DE FESTIS MOBILIBVS.

Est autem mobilia, cum ex lunationis discretionē habeantur, ordinis ratione consequenter de eis est pertractandum. Est igitur Festum mobile, quod penes ascensum uel descensum lunationis celebratur, nullum sibi locum in Calendario habens assignatum. Sunt quidem. 5. festa mobilia, scilicet; Septuagesima, quadragesima, & Pascha, Rogationes & Pentecoste.

Dicitur autem Septuagesima, d. 70. quasi con

tinens. 70. dies. Incipit enim à Dominica qua cā-  
dit Alleluia, & extēditur usque ad diem Domini-  
cum in Albis. Quidam tamen supponunt eam in  
Pascha terminari, dicentes tempus à denario in  
quo terminatur, de iure nominari. Illud autem tem-  
pus recolit Ecclesia ad memoriam. 70. annorum, in  
quibus filij Israel erant sub seruitute Babylonica.

Quadragesima similiter dicitur à. 40. continet  
enim. 40. dies. Et illud tempus recolit Ecclesia,  
quoniam Moyses tot diebus ieiunauit, cum acci-  
peret legem Domini. Elias etiam tot dies ieiuna-  
uit, & raptus est in cœlum, uel in locum Dei se-  
cretum. Christus etiam tot diebus ieiunauit, &  
diaboli uicit tentationes. Et quia omnis Christi  
actio nostra est instructio, ergo & nos tot die-  
bus ieiunare debemus. Sicut enim res nostras deci-  
mamus, ita nos & uitam nostram decimare debe-  
mus Deo. Sed. 36. dies & dimidiis, sunt decima-  
pars anni. Quoniam autem nihil est à media die  
ieiunium inchoare, ad mundificationem corpo-  
rum ex ingurgitatione. 4. dies cinerum superad-  
duntur alijs.

Pascha, Boëois, transitus, idem sonant, sed à di-  
uersis linguis imponuntur. Pascha enim Hebraicè  
Boëois græcè, transitus latinè dicitur, quoniam tū  
de non esse ad esse factus est rerum transitus, atque

Angeli exterminatoris in ueteri lege in Aegypto,  
necnon & Christi de mortalitate ad immortalita-  
tem, nostram figurantis transitionem de uitij ad  
uirtutes, & de hac uita ad æternam.

Dies autem Dominicus præcedens ieiunia ro-  
gationum, Rogationes appellatur, tunc enim non  
solum contra lupos corporales, quemadmodum  
iamdudum in Gallia, sed & contra spirituales, ie-  
iunia, processiones, & orationes continuare nos  
rogat Ecclesia.

Pentecoste dicitur à pente, quod est quinque; &  
Coste, quod est decem, quasi continens quinquies  
decem dies, sunt enim. 50. dies inter Pascha &  
Pentecosten utroque die incluso, & illud tempus  
recolit Ecclesia, quoniam in monte ardenti Lex  
Moysi tunc data est, & dona Spiritus Sancti A-  
postolis. (ΠΕΝΤΗΚΟΣΤΗ quinquagesimam so-  
nat latine.

Ad hæc autem festa scienda, quædam genera  
numerorum inueniuntur, ut inferius patebit, &  
dies ante festum, ubi huiusmodi numeri terminan-  
tur, Termini appellantur. Terminus enim dies est  
Clauem finiens, festum mobile futurum in die domi-  
nica proxima annuatim designans. Est itaque regu-  
la in computo, quod terminus & festum nunquam  
simul sunt. Vnde uersus,

Terminus & festum nunquam celebrantur ibidem  
Lux teneat Domini post terminum proxima fe-  
stum.

Et hoc, ne uideamur Iudeos imitari, qui simul  
ponunt terminum & festum, uel quia terminus  
Paschæ semper est. 14. die lunationis Aprilis, &  
Pascha magis accedens ad terminum, est quinto-  
decimo die eiusdem lunationis. Quare non pote-  
runt simul esse terminus & festum. Ratio autem  
quare festa mobilia non habent certa loca in Ca-  
lendario, hæc est. Pascha (quemadmodum cætera  
festa mobilia) semper debet celebrari die Domini-  
co. Sed cum una & eadem litera in Calendario nõ  
semper denotet diem Dominicum, non potuit Pas-  
cha nec cætera festa mobilia habere certum locum  
in Calendario. Quidam etiam dicunt quod Domi-  
nus passus est. 10. Calendas Aprilis, ibi enim fecit  
Adam, sicut dicit Theophilus Alexandria Episco-  
pus, & sui consentanei. Vnde dicunt quod eodem  
die uoluit pati pro primo homine & suo genere re-  
dimendo, quo die ipsum formauit.

Alij uero sicut Hieronymus & sui sequaces, di-  
cunt quod. 8. Calendas Aprilis passus est Domi-  
nus. Ibi enim sumpsit carnem de beata uirgine,  
unde dicunt quod eodem die, quo carnem assump-  
sit, passus est. Præceptum etiam erat in ueteri te-

stamento, agnum Paschalem post quartumdecimū diem lunationis Aprilis immolari ad uesperā, hoc est in principio. 15. diei eiusdem lunationis.

Ita Christus qui uerus agnus est, & per illum agnum typicum figuratus, passus est in plenilunio, ut sicut eo tempore lumen nocti attribuitur copiosius, ita per passionem eius humane nature gratia redemptionis plenius exhibeatur. Cum ergo Lunationes Aprilis, quandoque sint prius, quandoque posterius, non potuit Pascha in certo loco assignari. Est autem infimum Pascha. 11. Calendas Aprilis, quod sic patet. Infima lunatio Aprilis incipit. 8. idus Martij, ubi. 16. pro aureo numero assignantur, lunationes quidem duæ in proximo præcedentes sunt Embolismales, duæ uero reliquæ illas præcedentes, sunt lunationes Martij, licet posterior illarum duarum terminetur prima die Aprilis, quod contingit per quartum Embolismum. Si igitur à prima lunatione Aprilis, & iam dicta computentur. 14. dies, primus terminus paschalis erit. 11. Calendas Aprilis, & bene potest contingere, mediante uariatione literarum Dominicalium, quod Pascha celebretur in crastino illius termini, hoc est undecimo Calendas Aprilis. Vnde ibi solet notari primum, siue infimum Pascha. Ex dictis patet, quod bene da-

tur hæc regula.

Post Martis nonas ubi sit noua Luna require.

Bis septem completo dies ut Pascha sequatur.

Omnes enim lunationes Aprilis incipiunt post nonas Martij. Quod autem ultimum Pascha celebratur. 7. Calendas Maij, sic patet. Nam ultima lunatio Aprilis, signatur contra Nonas ipsius, ubi aureus numerus est. 8. quamuis illa terminetur tertia die Maij, sicut sua præcedens, secunda die Maij, quod contingit propter tertium & ultimum Embolisimum. Si igitur ab ultima lunatione Aprilis iam dicta computentur. 14. dies, erit ultimus terminus Paschæ. 14. Calendas Maij, & potest contingere mediante uariatione literarum Dominicalium, quod ille terminus sit dies Dominicus, unde dies Paschæ celebrabitur in sequenti Dominico, hoc est. 7. Calendas Maij. Ex his patet, quod in illis. 35. diebus, qui sunt inter. 11. Calendas Aprilis, & 7. Calendas Maij, siue prius siue posterius semper habet Pascha celebrari, ita quod in anno communi descendat terminus Paschæ per. 11. dies. In anno Embolismali ascendat per. 19. dies. Vnde uersus.

Pascha nec undenas Aprileis ante Calendas.

Nec post septenas Maij ualet esse Calendas.

Embolis ascendens Canonis de lucibus anno.



Communi recedit undenis terminus eius.

Magnus autem Cyclus Paschalis est, qui multiplicato Solari per lunarem. 532. conficitur annis, quam cum ex ordine mensium dierumque summam compleuerit, mox in seipsum reuolutus, omnia quæ ad Solis lunæque cursum pertinent, eodem quo prius præterierunt, semper tenere restaurat, In cuius quidem quoto anno fueris, sic scitur. Annis Domini addantur. 20. nam Vigeno primo Christus natus fuit anno, & totum per summam Cycli diuidatur, & si nihil fuerit residuum, sumus in ultimo. Si uero aliquid, ostendet nobis in quoto anno sumus.

Ad habendum autem. 5. festa mobilia, communiter inuenti sunt quidam numeri, qui Claues dicuntur. Vnde Clauis est numerus in unoquoque annorum Cycli decennouennalis diuersus, festorum mobilium certitudinem per terminum ostendens, sicut enim per Claues fit introitus in atrium, ita per numeros istos in notitiam festorum mobilium. Cum igitur in Cyclo decennouennali sint. 19. anni unusquisque suam habebit Clauem. Sicut in figura Cycli decennouennalis. Epactarum & clauium, figura præsentī subiicitur.



Primus itaque. 26. habet pro Clauē, à qua formari possunt Clauēs sequentes, per additionem. 19. hoc tamen prænotato, quod si excreſcant. 40. uel maior numerus, reijciantur. 30. & residuum erit Clauis anni ſequentis. Sed ſi ex abrupto queratur Clauis alterius anni, tunc his uerſibus inuenietur,

Vicenos quinos, tredecim, plus aſſe tricenis,  
Vnde uigin hepta digitis pro Clauibus apta.

Computetur enim per omnes digitos sinistræ manus, donec uenias ad annum Cycli de quo Clauis quæritur, sumpto initio à pollice, & si annus quæ situs sistat in pollice, illius anni numero adde. 25. Si in indice. 13. si in maiori digito. 31. Si in medico 19. Si in auriculari. 7. & uersibus sic expositis clauis manifestantur.

Hoc tamen prænotato, quod si excrecant. 40. uel maior numerus, reiectis. 40. residuum pro clauis sumatur. Loca autem Clauium his assignantur uersibus,

In Iano prima, supremâque Marte secunda.

Aprilis terna sex monstrat & ultima Clauis.

Habitis igitur Clauis & loco clauis, si festa mobilia in anno quocunque scire uolueris, sumatur Clauis illius anni, & ad habendum festum quodcunque mobile, tot dies computentur à loco Clauis illius festi, quot unitates Clauis continet, & dies ubi terminatur talis computatio, terminus dicitur, & in die Dominica proxima sequente, celebratur festum. Hoc tamen prænotato, quod ad habendam Septuagesimam uel Quadragesimam, in anno bisextili, Clauis addenda est unitas. Aliter enim contingeret Septuagesimam & Quadragesimam per Clauem prius celebrari quam deberet. 7. diebus, Per hos autem uersus specialiter habetur termi-

nus Septuagesimæ, & per consequens cætera festa mobilia.

A festo Stellæ numerando perficelunæ.

Quadraginta dies & Septuagesima fiet,

Si sit bisextus lux additur una diebus.

Si cadat in lucem Domini suppone sequentem.

A principio lunationis illius, in qua est Epiphania Domini, quæ propriè Festum Stellæ dicitur, siue illa fuerit in Ianuario, siue in Decembri, computentur. 40. dies descendendo, & quadragesimus erit dies terminus Septuagesimæ, & in die Dominica proxima erit Septuagesima. Si sit bisextus, addatur dies unus, sicut in uersibus innuitur.

Ad habendum autem terminum Paschæ sciantur isti uersus,

Esse grauem nobis bello carnem caueamus.

Bellum sepe gerens etenim puto deiicit hostem.

Mox animæ lucrum inuenies cum relligiosis.

In his uersibus sunt. 19. dictiones, de seruiens 19. annis Cycli æcenouennalis, prima primo, & sic deinceps. Si igitur alicuius anni Cycli decennouennalis terminum uelis inuenire Paschalem, sumatur dictio seruiens illi anno, & si terminetur in M. literam, terminus Paschæ erit in Martio, tot diebus computatis, à fine Martij ascendendo, quo-

ta est prima litera illius dictionis in Alphabeto, & ubi terminatur talis computatio, ibi est terminus Paschæ. Si autem dictio non terminetur in M. terminus Paschæ erit in Aprili, tot diebus computatis à principio Aprilis descendendo, quota est prima litera eiusdem dictionis in Alphabeto.

Per hos autem uersus scitur, quot Septimanæ sint inter Dominicam proximam, siue ante, siue post Natale domini & Quadragesimam.

Ira grauat karos, hanc gignit kaumatōs hostis.

Lex iubet hostilis kaueatur inertia gentis.

Karceris humani gerit instans hora leuamen.

Hic enim dictiones. 19. seruiunt. 19. annis Cycli decennouennalis, prima primo, & sic deinceps. Vide itaque quota sit litera prima dictionis anno seruiantis in Alphabeto, & tot Septimanæ erunt in tempore quæsito. Ne tamen quandoq; fallât, caueat sibi calculator, non enim ueritati uiciniores assignari potuerunt dictiones.

## Q V I D L V S T R V M, I N D I C I O, & S æ c u l u m.

I N hac postrema operis particula de temporis partibus compositioribus, in usu etiam Ecclesiæ rarioribus cōsequēs

est determinare.

Est igitur Lustrum spatium quinque annorum,  
à Romanis consideratum, ad tempus dictaturarum, quod descendit ab hoc uerbo polysemo Lustrum lustras. In fine enim quinquennij cuiuslibet, & in principio Dictaturæ circumibant ciues Romani ciuitatem cum cereis & candelis, & postea in Martio campo dictatorem elegerunt. Adhuc etiam Ecclesia memorat Lustra, dicens. Lustra sex qui iam peracta &c.

Indictio est spatium. i. 5. annorum ad recipien-  
da ab extraneis tributa institutum, & dicitur ab indico, cis, quod ad Pontifices pertinet. Vnde uersus,

Edicunt reges, indicit festa Sacerdos.

Cum enim Romani dominarentur ferè uniuersis nationibus, terras fecerunt sibi tributarias, precipientes, ut terræ remotiores propter difficultatem transitus, in fine primi quinquennij persoluerent aurum ad dominationis typum: in fine secundi, argentum ad stipendia militum: in fine tertij, æs & ferrum ad armorum reparationem. Vnde indictio à quibusdam ærea ab ære dicitur, uel ferrea à ferro, in fine eius soluto. Vnde instituerunt Romani, quod nullum priuilegium, nulla etiam conuentio scripto commendata esset stabilis uel

firma, nisi haberet annum indictionis annotatum:  
Et hoc, ne tributorum soluendorum memoria la-  
beretur. Nos autem in tribus utimur Indictione,  
scilicet, in priuilegio, in cereo Paschali, Et in de-  
dicationibus Ecclesiarum. Incipit autem Cyclus  
indictionis in Septembri, quia cum tunc sit ubertas  
fructuum, bene possunt solui tributa. Si autem pla-  
ceat cuiquam scire, in quoto Indictionis simus, an-  
nis Domini addantur. 3. quoniam Dominus dicitur  
natus fuisse in quarto anno Indictionis, Et totum  
diuidatur per. 15. Et si nihil fuerit residuum, su-  
mus in ultimo anno Indictionis. Si uero aliquid, o-  
stendit nobis in quoto anno simus. Est etiam hoc no-  
men Indictio æquiuocum, ad totum Cyclum Et ad  
quemlibet annum illius Cycli.

Sæculum autem dicitur spatium. 100. anno-  
rum, unde, multa præteriere secula. Sæculum etiã  
dicitur mundus Et tota machina mundana, cū suis  
contentis.

Æuum uero dicitur spatium mille annorum.  
Dicitur etiam æuum idem quod ætas, unde homo  
magni æui dicitur. Dicitur etiam æuum idem quod  
mora, unde Boetius, libro. 3. Metro. 9.

O qui perpetua mundum ratione gubernas,  
Terrarum cœliq; sator, qui tempus ab æuo  
Ire iubes, stabilisq; manens das cuncta moueri.



Tu stabilire uelis opus hoc per temporis æuum.

PERORATIO.

M. Christi bis C. quarto deno quater anno  
De Sacro Bosco discreuit tempora ramus.  
Gratia cui nomen dederat diuina Ioannes.  
Annuat hæc nobis huius sic carpere fructum,  
Ecclesiæ Christi, quod nos hinc fructificemus.

Amen.

FINIS.

CISIO IANVS IN CARMINA  
redactus, quo facilius à pueris  
edisci possit.

CISIO, Ianus, Epi, sibi uendicat, Oc, Feli, Marc,  
An.

Prisca, Fab, Hag, Vincenti, Paulus, nobile Lumen.

BRIG, Purg, Basil, Ag, Dor, Febru, Ap, Schola-  
stica, Valent,

Inli, coniunge tunc Petrum, Matthiam inde.

MARTIVS, Adria, Per, decoratur, Gregorio,  
Cyr.

Gerdrud, Alba, bene iuncta Maria genitrice.

**A P R I L.** in Ambrosij festis ouat atq; Tiburti.  
Et Valer, sanctiq; Georg, Marciq; Vitalis.

**P H I L I P,** Crux, Flor, Goth, Iohā latin, Epi, Ne,  
Ser, & Soph.

Maius in hac serie tenet Vrbā in pede Cris, Can.

**N I C,** Marcelli, Boni, dat Iun, Primi, Ba, Cyrini.  
Vitiq; Mar, Protus, Al, Sācti Iohan, Io, Dor, Le,  
Pe, Pau.

**I V L,** Visit, Huldreich, Oc, Bil, Chilli, Fra, Bene,  
Margar, Apost, Al.

Arnolphus, Prax, Mag, Ap, Chris, Iacobiq; Sim,  
Abdon.

**P E,** Steph, Steph, Protus, Six, Don, Cyr, Ro, Lau  
Tybur, Hyp, Eus.

Sūptio, Agapiti, Timo, Bartolo, Ruff, Aug, Col,  
Aucti.

**E G I D I V M,** Sep habet, Nat, Gorgon, Protiq;  
Crux, Nic.

Euph, Lampertiq; Matth, Mauricius, & Da,  
Vuē, Mich, Hier.

REMIQ; Francisus, Marcus, Di, Ger, Ardiq;  
Calix  
Galli, Lucas, uel Vnd, Se, Seue, Crispini, Simonis,  
Quin.

OMNE, Nouember, Leon, Qua, Theo, Martin,  
Briijq;  
Post hæc, Elisa, Ce, Cle, Cris, Catharina, Sat, An.

DECEMBER, Barba, Nicolam, & alma Lucia.  
Sanctus abinde Thomas, modo Nat, Steph, Ioh,  
Pu, Thomæ, Syl.

P I N I S.



THE NEW YORK PUBLIC LIBRARY

ASTOR LENOX TILDEN FOUNDATION

500 N. 5TH ST. NEW YORK, N.Y.

1891

THE NEW YORK PUBLIC LIBRARY

ASTOR LENOX TILDEN FOUNDATION

NEW YORK, N.Y.

1891

